

易水

巨馬水

遠水

滹沱水

灤水

小遠水

滹沱水

灤餘水

淇水

派水

沽水

滋水

聖水

鮑邱水

濡水

水經注釋卷十一



仁和趙一清誠夫錄

易水

滋水

補 滹沱水

補 派水

補 滋水

易水出涿郡故安縣閭鄉西山

易水出西山寬中谷東逕五大夫城南昔北平侯王譚

不同王莽之政子興生五子並避時亂隱居此山故其

舊居世以為五大夫城即此一清按下有脫字岳讚云五王在

中龐葛連續者也易水東左與子莊溪水合水北出子

莊關南流逕五公城西屈逕其城南五公即王興之五

子也光武即帝位封為五侯元才北平侯益才安喜侯
顯才蒲陰侯仲才新市侯季才為唐侯所謂中山之五

王也俗又以五公名居矣后弟譚字子元河北平侯惟元

平阿侯薨子仁嗣初莽幼孤平阿侯譚多稱莽久之封

莽新都侯仁素剛直莽憚之為安漢公迫仁自殺謚刺

侯子述嗣按此則譚亦憐愛莽矣所不同於莽者平阿

侯仁也與豈仁之同生乎考兩漢書譚諸子董賢傳有

去疾哀帝時侍中尹闔亦見張步傳莽東郡太守隗囂

傳有向莽安定大尹馬嚴傳有仁子術即譚傳之述也

莽九江連率馬援傳有仁子磐馮爵土擁富貴東觀記

以為述子者凡此皆介恃同根盤跨維城彼九族之降

心若四體之無骨獨與父子自竄北鄙絕意閭朝澗泉

共清林風愈引若非酈氏幾于無聞矣檢太平御覽兩

引河北記曰易縣有五公城王譚不從王莽譚子興生

五子避隱于此世祖並封為侯所謂中山五侯也其西

三十里有五大夫城水經注蓋引其說若此言非爽王

氏再世有二五侯矣全氏曰善長可謂輕信者矣王譚

封平阿不封北平其妄一也譚以特進卒歷其弟商根

枋政而莽始繼之譚之墓木拱矣安得不同其政乎其

妄二也莽之凶暴其子稍不順即殺之豈容五才遠引

其妄三也且其封爵何以皆在北平等縣其妄四也班

范荀袁並不一及其妄五也方叔蓋疑之而未敢頌言

日知錄曰兄弟二名而用其一字者世謂之排行起自

晉末漢人所未有也水經注昔北平侯王譚不同王莽

之政云云是後人追撰妄說東漢人二名者亦少又按

寰宇記五公城二館之城一清按此句澗曲泉清山高

事出河北記也

林茂風烟披薄觸目栖情方外之士尚憑依舊居取暢

林木其水東南入于易水易水又右會女思谷水水出

西南女思澗東北流注于易謂之三會口易水又東屈

關門城西南即燕之長城門也與樊石山水合水源西

出廣昌縣之樊石山東流逕覆釜山下東流注于易水

易水又東歷燕之長城又東逕漸離城南蓋太子丹館高漸離處也易水又東逕武陽城南蓋易自寬中歷武夫關東出是兼武水之稱故燕之下都擅武陽之名左得濡水枝津故瀆武陽大城東南小城即故安縣之故城也漢文帝封丞相申屠嘉為侯國一清按史表文帝後三年封城東西二里南北一里半高誘云易水逕故安城外東南流即斯水也誘是涿人事經明證今水被城東南隅世又謂易水為故安河武陽蓋燕昭王之所城也東西二十里南北十七里故傅逮述遊賦日出北薊歷良鄉登金臺觀武陽兩城遼廓舊迹冥芒蓋謂是處也易水東

流而出於范陽

東過范陽縣南又東過容城縣南

易水逕范陽縣故城南秦末張耳陳餘為陳勝略地燕

趙命蒯通說之范陽先下是也漢景帝中三年封匈奴

降王代為侯國一清按史表端侯代以景帝中二年封漢表作靖侯范代范字羨文王莽

之順陰也易水又東與濡水合水出故安縣西北窮獨

山南谷東流與源泉水合水發北溪東南流注濡水濡

水又東南逕樊於期館西是其授首於荆軻處也濡水

又東南流逕荆軻館北昔燕丹納田生之言尊軻上卿

館之於此二城竝廣一里許俱在罡阜之上上袞而下

方濡水又東逕范陽城西北舊竭濡水枝流南入城逕相冢西冢互城側卽水塘也四周塋域深廣有若城焉其水側有數陵墳高壯望若青邱詢之古老訪之史籍竝無文證以私情求之當是燕都之前故墳也或言燕之墳塋斯不然矣其水之故瀆南出屈而東轉又分爲二瀆一水東注金臺陂一水逕故安城西側城南注易水夾塘崇峻邃岸高深左右百步有二釣臺參差交峙迢遞相望更爲佳觀矣其一水東出金臺陂東西六七步南北五十步側陂西北有釣臺高十餘丈方可四十餘步陂北十餘步有金臺臺上東西八十許步南北

加減高十餘丈昔慕容垂

全氏曰當作慕容德酈氏誤記

之爲范陽也

戍之卽斯臺也北有小金臺臺北有蘭馬臺竝悉高數丈秀峙相對翼臺左右水流徑通長廡廣宇周旋被浦棟堵咸淪柱礎尙存是其基構可得而尋意欲圖還上京阻於行旅造次不獲遂心訪諸耆舊咸言昭王禮賓廣延方士至如郭隗樂毅之徒鄒衍劇辛之儔宦遊歷說之民自遠而屆者多矣不欲令諸侯之客伺隙燕邦故修建下都館之南垂言燕昭創之於前子丹踵之於後故彫牆敗館尙傳鐫刻之石雖無經紀可憑察其古跡似符宿傳矣

蔡氏夢弼草堂詩箋曰春秋後語燕昭王曰安得賢士以報齊讎郭隗曰王能

築臺于碣石山前尊隗為師天下賢士必自至如其言
 作臺以金玉崇之號黃金臺述異記臺在幽州燕王故
 城中上谷圖經臺在易水東南十八里其說不同周氏
 密齊東野語曰燕臺世多以為昭王而王隱以為燕丹
 何也後見水經注云固安縣有黃金臺舊言昭王禮賢
 廣延方士故修建下都館之南陞燕昭創于前子丹踵
 于後以此知王隱以為燕丹者蓋如此也朱氏彝尊曰
 下舊聞曰按隋上谷圖經酈道元注水經金臺在易州
 明矣京師故迹傳是後人所築然自六朝至今垂之載
 記形之歌詠當竝存不廢也庖林曰文選注引上谷圖
 經曰黃金臺在易水東南十八里燕昭王置千金于臺
 上以延天下之士又王隱晉書曰段匹碑討石勒進屯
 故安縣故太子丹黃金臺據此金臺蓋有兩也酈氏以
 長廡被浦間館連都昭創于前丹踵于後然則曲榭鋪
 金虎臣畢學高臺蓄寶駿骨先來豈亦昭貽孫謀丹繩
 祖武者乎一清按一統志今都城及定興安肅皆有黃
 金臺惟在易州者為有
 據餘皆後人所為也 濡水自堰又東逕紫池堡西屈
 而北流又有渾塘溝水注之水出迺縣西白馬山南溪

中東南流入濡水濡水又東至塞口古纍石堰水處也
 濡水舊枝分南入城東大陂陂方四里今無水陂內有
 泉淵而不流際池北側俗謂聖女泉濡水又東得白楊
 水口水出迺縣西山白楊嶺下東南流入濡水時人謂
 之虎眼泉也濡水東合檀山水水出迺縣西北檀山西
 南流與石泉水會水出石泉固東南隅水廣二十許步
 深三丈固在眾山之內平川之中四周絕澗阻水八丈
 有餘石高五丈石上赤土又高一匹壁立直上廣四十
 五步水之不周者路不容軌僅通人馬謂之石泉固固
 上宿有白楊寺是白楊山神也寺側林木交蔭叢柯隱

景沙門釋法澄建刹于其上更為思元之勝處也其水南流注于檀水故俗有并溝之稱焉其水又東南流歷

故安縣北而南注濡水又東南流於容城縣西北大利

亭東南合易水而注巨馬水也故地理志曰故安縣閻

鄉易水所出至范陽入濡水闕駟亦言是矣又曰濡水

合渠許慎曰濡水入深深渠一清按今本說文云濡水東入漆涑誤也巨馬水注

云巨馬河即渠水可知善長所見之書尚未訛舛也二號即巨馬之異名然二易

俱出一鄉同入濡水南濡北易至涿郡范陽縣會北濡

又竝亂流入涑一統志方順河自完縣發源曰祁水即古濡水也和志濡水在北平縣西五

里舊志源出伊祁山谷名祁水古濡水有二方順河為南濡其北濡即北易下流為定興縣之沙河一清按觀

此則知道元此注之繆南濡會蒲蘇諸水合于雹河何曾至范陽與涑水合耶方順河即曲逆水也後人醜其名故

是則易水與諸水互攝通稱巨馬水又東逕容城

縣故城北渾濤東注至勃海平舒縣與易水合闕駟曰

涿郡西界代之易水而是水出代郡廣昌縣東南郎山

東北燕王仙臺東臺有三峯甚為崇峻騰雲冠峯高霞

翼嶺岫壑沖深含烟罩霧者舊言燕昭王求仙處其東

謂之石虎罡范氏漢書云中山簡王之窆也厚其葬採

涿郡山石以樹墳塋陵隧碑獸竝出此山謂之石虎山

山有所遺二石虎後人因以名罡罡之東麓即泉源所

導也經所謂閻鄉西山其水東流有涖水南會渾波同

注俗謂之為雹河司馬彪郡國志曰雹水出故安縣世

祖令耿況全氏曰范史是況子弇擊故安西山賊吳耐蠡符雹上

十餘營皆破之即是水者也易水又東逕孔山北山下

有鍾乳穴穴出佳乳採者燔火尋沙入穴里許渡一水

潛通流注其深可涉於中衆穴奇分令出入者疑迷不

知所趣每於疑路必有歷記返者乃尋孔以自達矣上

又有大孔豁達洞開故以孔山為名也其水又東逕西

故安城南即閭鄉城也歷送荆陘北者舊云燕丹餞荆

軻於此因而名焉世代已遠非所詳也遺名舊傳不容

不詮庶廣後人傳聞之聽易水又東流屈逕長城西又

東流南逕武隧縣南新城縣北史記曰趙將李牧伐燕

取武隧方城是也俗又謂是水為武隧津津北對長城

門謂之汾門史記趙世家云孝成王十九年趙與燕易

土以龍兌汾門與燕燕以葛城武陽與趙即此也一清按史

記趙世家云孝成王十九年趙與燕易土以龍兌汾門

臨樂與燕正義曰邢子勵趙記云龍山有四麓各有一

穴大如車輪春風出東秋風出西夏風出南冬風出北

按蓋謂龍兌也汾門括地志云易州永樂縣有徐水出

廣昌嶺流至北平縣東南歷石門中俗謂之龍門蓋汾

字之誤也按括地志之言非也龍門見滹水博陵縣注

亦曰汾水門又謂之梁門矣易水東分為梁門陂易水

又東梁門陂水注之水上承易水於梁門東入長城東

北入陂陂水北接范陽陂陂在范陽城西十里方一十

五里俗亦謂之為鹽臺陂陂水南通梁門淀方三里淀水東南流出長城注易謂之范水易水自下有范水通目又東逕范陽縣故城南即應劭所謂范水之陽也易水又逕樊輿縣故城北漢武帝元朔五年封中山靖王子劉條一清按漢表作脩脩有條音為侯國王莽更名握符矣地理風俗記曰北新城縣東二十里有樊輿亭故縣也易水東逕容城縣故城南漢高帝六年封趙將夜一清按漢表作將夕此從於深澤一清按索隱曰縣名屬中山此即地理志史表於深澤中山國深澤縣莽曰翼和者也而注文容城是涿郡之屬縣王莽更之曰深澤善長乃合二郡國之縣為一誤矣涿郡有南深澤不云是侯國寰宇記深澤縣下云南深澤城郡國縣道記云在東南二十五里以城名言之即是涿郡之屬縣以去國里數校近即此

是中山之屬縣方輿紀要深澤縣下云南深澤城在縣東南五十七里十道志云漢置深澤縣屬中山國今縣治是也又于滹沱河南置南深澤縣屬涿郡此城是後漢廢深澤縣而南深澤如故二縣川土相鄰趙侯之封邑當在此總非新莽所改名容城之深澤也漢志中山國北新城桑欽言易出西北東入滹一統志北新城故城在安肅縣西南二十里漢置闕駟曰河間有新城故加北後魏去北字北齊仍曰北新城尋省入清苑景帝中三年以封匈奴降王唯徐盧一清按史表唯徐盧是胡名漢表作攜侯徐盧攜又是諡攜唯聲相近百官公卿表太初三年於容城侯唯塗光為太常唯塗即唯徐光乃盧之孫於容城皆為侯國王莽更名深澤易水又東滙水注之其水上承二陂於容城縣東南謂之大滙澱小滙澱其水南流注易水謂之滙洞口水側有渾滙城易水逕其南東合滙水故桑欽曰易水出北新城西北東入滙自下

涿易互受通稱矣全氏曰按桑欽之言與漢志大相參耳善長蓋以互受通稱調停之一清按漢志涿郡中水縣應劭曰在易涿二水之間故曰中水酈說本此易

水又東逕易京南漢末公孫瓚害劉虞於薊下時童謠

曰燕南垂趙北際惟有此中可避世瓚以易地當之故

自薊徙臨易水謂之易京城在易城西四五里趙建武

四年石虎自遼西南達易京以京鄣至固令二萬人廢

壞之今者城壁夷平其樓基尙存猶高一匹餘基上有

井世名易京樓卽瓚所保也故瓚所與子書云袁氏之

攻狀若鬼神衝梯舞于樓上鼓角鳴于地中卽此樓也

易水又東逕易縣故城南昔燕文公徙易卽此城也闕

駟稱燕太子丹遣荆軻刺秦王與賓客知謀者祖道于

易水上燕丹子稱荆軻入秦太子與知謀者皆素衣冠

送之于易水之上荆軻起爲壽歌曰風蕭蕭兮易水寒

壯士一去兮不復還高漸離擊筑宋如意和之爲壯聲

士髮皆衝冠爲哀聲士皆流涕疑于此也余按遺傳舊

跡多在武陽似不饒此也漢景帝中三年封匈奴降王

僕黜師古曰黜音怛爲侯國也

又東過安次縣南

易水逕縣南鄭縣故城北東至文安縣與虜池合史記

蘇秦曰燕長城以北易水以南正謂此水也是以班固

闕駟之徒咸以斯水謂之南易

又東過泉州縣南東入于海

經書水之所歷浴次注海也

涑水出代郡靈邱縣高氏山

卽嘔夷之水也出縣西北高氏山山海經曰高氏之山

涑水出焉東流注于河者也其水東南流山上有石銘

題言冀州北界故世謂之石銘陁也其水又南逕候塘

候塘川名也又東合溫泉水水出西北暄谷其水溫熱

若湯能愈百疾故世謂之溫泉焉東南流逕興豆亭北

亭在南原土欹傾而不正故世以欹城目之東流注于

涑水又東莎泉水注之水導源莎泉南流水側有莎泉

亭東南入于涑水又東逕靈邱縣故城南水自中原南

注涑水應劭曰趙武靈王葬其東南二十里故縣氏之

縣古屬代漢靈帝光和元年中山相臧景上請別屬也

地理志曰靈邱之號在武靈王之前矣又按司馬遷史

記趙敬侯九年敗齊于靈邱一清按顧氏炎武曰此別

靈邱為齊靈邱不知齊境不得至代也方輿紀要靈邱

城在滕縣東三十里明水之南城周八里內有子城戰

國時齊南境邑孟子謂蚺龍曰子之辭靈邱而請士則

師史記齊威王元年三晉因齊喪來伐我靈邱是也則

名不因武靈王事如漢注涑水自縣南流入峽謂之隘

其水沿澗西轉逕御射臺南臺在北阜上臺南有御射

石碑一清按北史魏文成帝本紀靈邱有山高四百丈乃詔羣臣仰射山峯無能踰者帝彎弧發矢出三十餘丈過山南二百二十步

遂刊石勒銘和平二年事也南則秀嶂分霄層崖刺天

積石之峻壁立直上車駕浴澗每出所遊藝焉涇水西

流又南轉東屈逕北海王詳之石碣南御所屈石柱北

而南流者也

東南過廣昌縣南

涇水東逕嘉牙川太平寰宇記蔚州飛狐縣下引水經注云廣昌縣南有交牙城未詳所築

以地名交牙川為名一清按飛狐漢廣昌縣隋仁壽元年改今名交牙川即嘉牙川交嘉聲之轉川有

二水南來注之水出恆山北麓匯川三合逕嘉牙亭東

而北流注于涇水水之北山行即廣昌縣界涇水又東

逕倒馬關關山險隘是為深峭勢均詩人高岡之病良

馬傅嶮之一清按下有脫文全氏曰是困字行軒故關受其名焉關水

出西南長溪下東北歷關注涇涇水南山上起御坐於

松園建祇洹于東圃東北二面岫鄣高深霞峯隱日水

望澄明淵無潛甲行李所逕鮮不徘徊忘返矣

又東南過中山上曲陽縣北恆水從西來注之

涇水自倒馬關南流與大嶺水合水出山西南大嶺下

東北流出峽峽右山側有祇洹精廬飛陸陵山丹虹盤

梁長津泛瀾縈帶其下東北流注于涇涇水又屈而東

合兩嶺溪水水出恆山北阜

一清按漢志常山郡上曲陽縣恆山北谷在西北有

祠并州山東北流歷兩嶺閒北嶺雖層陵雲舉猶不若南巒

峭秀自水南步遠峯石磴逶迤沿途九曲歷睇諸山咸

為劣矣抑亦羊腸邛來之類者也齊宋通和路出其閒

其水東北流注于涇水又東左合縣水水出山原岫盤

谷輕湍濬下分石飛懸一匹有餘直灌山際白波奮流

自成潭渚其水東南流揚湍注于涇涇水又東流歷鴻

山世謂是處為鴻頭疑即晉書地道記所謂鴻上關者

也初學記定州引水經注云定水東流歷山俗謂之戲

頭即晉書所謂鴻上關一清按是注無定水之目而

戲頭之稱又與古志關尉治北平而畫塞于望都東北

全乖存之以廣異說

去北平不遠兼縣土所極也涇水於是左納鴻上水水

出西北近溪東南流注于涇水也

又東過唐縣南

涇水又東逕左人城南應劭曰中人城西北四十里亦

或謂之為唐水也水出中山城之西如北城內有小山

在城西側而銳上若委粟焉疑即地道記所云望都縣

有委粟關也俗以山在邑中故亦謂之中山城以城中

有山之目因復謂之為廣唐城也故中山記以為中人

城又以為鼓聚殊為乖謬矣言城中有山故曰中山城

也中山郡治京相璠曰今中山望都西北二十里有故

中人城望都城東有一城名堯姑城本無中山之傳璠或以為中人所未詳也中山記所言中人者城東去望都故城一十餘里二十里則減但苦其不東觀矣異說咸為爽矣今此城於盧奴城北如西六十里城之西北泉源所導西逕郎山北郎唐音讀近實兼唐水之稱西流歷左人亭注涇水又東左會一水水出中山城北狼山阜下一清按隋書地理志唐有郎山即此山蓋郎狼音同通用與古易水所出及徐水所注之郎山有別彼郎山在今易州西南四十里也亦謂之唐水也隋書地理志永樂縣有郎山即此山然於城非在西又名之為雹水又兼二名焉西南流入涇竝所未詳蓋傳疑耳涇水又東恆水從西來注之自

下涇水兼納恆川之通稱焉即禹貢所謂恆衛既從也

漢志常山郡上曲陽縣恆山禹貢恆水所出東入涇涇水又東右苞馬溺水水出

上曲陽城東北馬溺水東北流逕伏亭晉書地道記曰

望都縣有馬溺關中山記曰八渡馬溺是山曲要害之地

一一關勢帶接疑斯城即是關尉宿治異目之來非

所詳矣馬溺水又東流注于涇涇水又東逕中人亭南

春秋左傳昭公十三年晉荀吳率師侵鮮虞及中人大

獲而歸者也涇水又東逕京邱北世謂之京陵南對漢

中山頃王陵涇水北對君子岸岸上有哀王子憲王陵

坎下有泉源積水亦曰泉上岸涇水又東逕白土北南

卽靖王子康王陵三墳竝列者是矣涇水又東逕樂羊城北史記稱魏文侯使樂羊滅中山蓋其故城中山所造也故城得其名涇水又東逕唐縣故城南北二城俱在涇水之陽故曰涇水逕其東城西又有一水導源盧奴縣之西北是城之西北平地泉湧而出俗亦謂之爲唐水也東流至唐城西北隅竭而爲湖俗謂之唐池蓮荷被水勝遊多萃其上信爲嬉處也其水南入小溝下注涇水自上歷下通禪唐川之兼稱焉應劭地理風俗記曰唐縣西四十里得中人亭今于此城取中人鄉則四十也唐水在西北入涇與應符合又言堯山者在南

則無山以擬之爲非也關駟十三州志曰中山治盧奴唐縣故城在國北七十五里駟所說北則非也史記曰帝嚳氏沒帝堯氏作始封於唐望都縣在南今此城南對盧奴故城自外無城以應之考古知今事義全違俗名望都故城則八十許里距中山城則七十里驗途推邑宜爲唐城城北去堯山五里與七十五里之說相符然則俗謂之都山卽是堯山在唐東北望都界一清按漢志注此是張皇甫謚曰堯山一名豆山今山於城北而如東晏說蘄絕孤峙虎牙桀立山南有堯廟是卽堯所登之山者也地理志曰堯山在南一清按漢志注此是應劭說今考此城之南

又無山以應之是故先後論者咸以地理志之說為失
 又即俗說以唐城為望都城者自北無城以擬之假復
 有之途程紆遠山河之狀全乖古證傳為疎罔是城西
 北豆山西足有一泉源東北流逕豆山下合蘇水亂流
 轉注東入澧是豈唐水乎所未詳也又於是城之南如
 東一十餘里有一城俗謂之高昌縣城或望都之故城
 也故縣目曰望都縣在高昌南皇甫謐曰相去五十里
 稽諸城地猶十五里蓋書誤耳此城之東有山孤峙世
 以山不連陵名之曰孤山孤都聲相近疑即所謂都山
 也帝王世紀曰堯母慶都所居張晏曰堯山在北堯母

慶都山在南登堯山見都山故望都縣以為名也唐亦

中山城也為武公之國周同姓全氏曰按中山隗姓司

同姓也周之衰也國有赤狄之難齊桓霸諸侯疆理邑土

遣管仲攘戎狄築城以固之全氏曰按國語及管子齊

中山也蓋邢衛諸國有赤狄之難道元誤以中山為中
牟故以山戎為赤狄皆誤也一清按寰宇記引輿地志
云盧奴城北臨澧水南面派河杜預
謂之管仲城蓋古記相傳如是也 其後桓公不恤國

政周王問太史餘曰今之諸侯孰先亡乎對曰天生民

而令有別所以異禽獸也今中山淫昏康樂逞欲無度

其先亡矣後二年果滅魏文侯以封太子擊也漢高祖

立中山郡景帝三年為侯國一清按漢書景十三王傳
中山靖王勝以景帝前二

年封然則王莽之常山也魏皇始二年破中山立安州是王國也

天興三年改曰定州治水南盧奴縣之故城昔耿伯昭

歸世祖于此處也涿水之右盧水注之水上承城內盧

水池地理志曰盧水出北平疑為疎闊駟應劭之徒

咸亦謂是矣一清按漢志中山國北平縣下云又有盧水亦至高陽入河此中山國之北平縣非

右北平郡也應仲瑗乃加右字注于盧奴縣之下則繆矣道元并孟堅而非之何耶中山之北平縣在今保定府完縣右北平郡治

則今薊州之境也余按盧奴城內西北隅有水淵而

不流南北一百步東西百餘步水色正黑俗名曰黑水

池或云水黑曰盧不流曰奴故城地藉水以取名矣池

水東北際水有漢中山王故宮處臺殿觀榭皆上國之

制簡王尊貴壯麗有加始築兩宮開四門穿城北累石

竇通涿一清按涿字疑誤唐水流於城中造魚池釣臺戲馬之

觀歲久頽廢遺基尚存今悉加土為利刹靈圖池之四

周民居駢比填徧穢陋而泉源不絕暨趙石建武七年

遣北中郎將始築小城興起北榭立宮造殿後燕因其

故宮建都中山小城之南更築隔城興復宮觀今府榭

猶傳故制自漢及燕涿一清按涿字疑誤涿水逕石竇石竇既

毀池道亦絕水潛流出城潭積微漲涓水東北注于涿

涿水又東逕漢哀王陵北冢有二墳故世謂之兩女陵

非也哀王是靖王之孫康王之子也一清按漢表靖王之子曰哀王哀王

之子曰穰王師古曰穰音與康同穰惡諡也
好樂怠荒曰穰今注父子倒易舛繆甚矣 涇水又東

右會長星溝溝在上曲陽縣西北長星渚渚水東流又

合洛光水水出洛光溝東入長星水亂流東逕恆山下

廟北漢末喪亂山道不通此舊有下階神殿中世以來

歲書法族焉晉魏改有東西二廟廟前有碑闕壇場相

列焉顧炎武北嶽辨云漢書云常山之祠于上曲陽應劭風俗通云廟在中山上曲陽後漢書章帝元和

三年春二月戊辰幸中山遣使者祠北嶽于上曲陽郡國志中山國上曲陽故屬常山恆山在西北則其來舊

矣水經注乃謂此為恆山下廟漢末喪亂山道不通而祭之于此則不知班氏已先言之乃孝宣之詔太常非

漢末也其水東逕上曲陽縣故城北本岳牧朝宿之邑也

古者天子巡狩常以歲十一月至于北岳侯伯皆有湯

沐邑以自齋潔周昭王南征不還巡狩禮廢邑郭仍存

秦罷井田因以立縣縣在山曲之陽是曰曲陽有下故

此為上矣王莽之常山亭也又東南流胡泉水注之水

首受胡泉逕上曲陽縣南又東逕平樂亭北左會長星

川東南逕盧奴城南又東北川渠之左有張氏墓冢有

漢上谷太守議郎張平仲碑光和中立川渠又東北合

涇水水有窮通不常津注

又東過安熹縣南

縣故安險也其地臨嶮有井塗之難漢武帝元朔五年

封中山靖王子劉應為侯國王莽更名寧嶮漢章帝改

曰安熹中山記曰縣在唐水之西山高岸嶮故曰安嶮
邑豐民安改曰安熹秦氏建元中唐水汎漲高岸崩頽
城角之下有大積木交橫如梁柱焉後燕之初此木尙
在未知所從余考記稽疑蓋城地當初山水洿邊漂淪
巨椳阜積于斯沙息壤加重以成地板築旣興物固能
久耳滄水又東逕鄉城北古舊盧奴之鄉也中山記曰
盧奴有三鄉斯其一焉後隸安熹城郭南有漢朝時孝
子王立碑

又東過安國縣北

滄水歷縣東分爲二水一水枝分東南流逕解瀆亭南

漢順帝陽嘉元年封河間孝王子淑於解瀆亭爲侯國
孫宏卽靈帝也又東南逕任邱城南又東南逕安郭亭
南漢武帝元朔五年封中山靖王子劉傳富爲侯國沈氏
曰史表作安郭侯博此從漢表索隱曰表在涿郡而善
長以爲卽中山之安國地理志涿郡無安郭縣疑是鄉
亭之名其水又東南流入于呼池滄水又東北流逕解瀆
亭北而東北注之矣

又東過博陵縣南

一清按博陵爲桓帝更名又
在王忠文所指順帝之後

滄水東北逕蠡吾縣故城南地理風俗記曰縣故饒陽

之下鄉者也自河間分屬博陵漢安帝永初七年封河
間王開子翼爲都鄉侯順帝永建五年更爲侯國也沈氏

曰永初當作元初翼由縣侯貶非封也又逕博陵縣故城南即古陸城漢

武帝元朔二年封中山靖王子劉貞為侯國者也全氏

表作陸城在涿郡當從史表作涇城漢書田叔傳亦作

涇城一清按地理志涿郡無陸城陸城中山國之屬縣

也下云博陵史記蠡吾故縣蠡吾屬地理風俗記曰博

涿郡故表云涿也二縣川土相鄰矣陵縣史記蠡吾故縣矣漢質帝本初元年繼孝沖為帝

何氏曰是桓帝繼追尊父翼陵曰博陵因以為縣又置

郡焉漢末罷還安平晉太始年復為郡今謂是城為野

城涿水又東北逕侯世縣故城南全氏曰按侯世不知

遠軍東光縣有侯井城引郡國縣道記云後漢省舊地

理書竝失其所在以理推之蓋在今弓高縣西北三十

五里房將池側置縣謂之侯井地理志河間國之第二

縣曰侯井其即侯世歟一清按非也侯世縣故城在蠡

縣東北侯井廢縣在東光縣西

兩地懸殊豈可混而為一乎又東北逕陵陽亭東又

北左會博水水出望都縣東南流逕其縣故城南王莽

更名曰順調矣又東南潛入地下博水又東南於瀆重

源湧發東南逕三梁亭南疑即古勺梁也竹書紀年曰

燕人伐趙圍濁鹿趙武靈王及代人救濁鹿敗燕師于

勺梁者也今廣昌東嶺之東有山谷名之曰濁鹿羅城

地不遠土勢相鄰以此推之或近是矣所未詳也博水

又東南逕穀梁亭南又東逕陽城縣散為澤渚渚水瀦

漲方廣數里匪直蒲筍是豐實亦偏饒菱藕至若變童

卵女弱年崽子或單舟採菱或疊舸折芰長歌陽春愛

深滹水掇拾者不言疲謠詠者自相和于時行旅過矚亦有慰于羈望矣世謂之為陽城澱也陽城縣故城近在西北故陂得其名焉郡國志曰蒲陰縣有陽城者也今城在縣東南三十里其水又伏流循瀆屆清梁亭西北重源又發博水又東逕白隄亭南又東逕廣望縣故城北漢武帝元朔二年封中山靖王子劉忠為侯國又東合堀溝溝上承清梁陂又北逕清源城東一清按清源方輿紀要作清涼故城在今保定府東南五十里即將梁也漢武帝元朔二年封中山靖王子劉朝平為侯國其水東北入博水博水又東北左則濡水注之水出蒲陰縣西昌安郭南中山記曰

郭東有舜氏甘泉有舜及二妃祠稽諸傳記無聞此處世代又遠異說之來於是乎在矣其水自源東逕其縣故城南枉渚迴湍率多曲復亦謂之為曲逆水也張晏曰濡水於城北曲而西流是受此名故縣亦因水名而氏曲逆矣春秋左傳哀公四年齊國夏伐晉取曲逆是也沈氏曰左傳是取逆時豈即曲逆耶杜預曰晉地漢高帝擊韓王信自代過

曲逆上其城望室宇甚多曰壯哉吾行天下唯雒陽與是耳詔以封陳平為曲逆侯王莽更名順平濡水又東與蘇水合水出縣西南近山東北流逕堯姑亭南又東逕其縣入濡濡水又東得蒲水口水出西北蒲陽山漢志

中山國曲逆縣蒲陽山蒲水所出

西南流積水成淵東西一百步南北

百餘步深而不測其水又東南流水側有古神祠世謂

之為百祠亦曰蒲上祠所未詳也又南逕陽安亭東晉

書地道記曰蒲陰縣有陽安關蓋陽安關都尉治世俗

名斯川為陽安壙蒲水又東南歷壙逕陽安關下名關

臯為唐頭坂出關北流又東流逕夏屋故城實中嶮絕

竹書紀年曰魏殷臣趙公孫哀伐燕還取夏屋城曲逆

者也其城東側因阿仍墉築一城世謂之寡婦城賈復

從光武追銅馬五幡於北平所作也世俗音轉故有是

名矣厄林曰考地理志太原廣武縣有賈屋山注云卽史記趙簡子登夏屋者按此則夏蓋讀作賈故夏

屋轉為賈屋又變為賈復而賈復更譌為寡婦也考古

證今此城蓋只夏屋城耳酈謂賈復築之亦穿鑿之甚

一清按周說固精密然汝水注云桓水二源奇導于賈

復城復南擊酈所築也俗語訛謬謂之寡婦城以寡婦

為賈復是一佳證且賈屋山名賈復城名固未可合而

為一也漢廣武縣在今山西代州西十五里有廣武故

城而賈復城在今直隸保定府完縣西南至唐縣四十

里方叔以并州之山鎮當冀域之城地可謂不思之甚

其水又東南流逕蒲陰縣故城北地理志曰城在蒲水

之陰一清按漢志註此是張晏說漢章帝章和二年行巡北岳以曲

逆名不善因山水之名改曰蒲陰焉水右合魚水水出

北平縣西南魚山山石若巨魚水發其下故世俗以物

色名川又東流注于蒲水又東入濡故地理志曰蒲水

蘇水竝從縣東入濡水又東北逕樂城南又東入博水

自下博水亦兼濡水通稱矣春秋昭公七年齊與燕會

于濡上杜預曰濡水出高易縣漢志涿郡高陽縣應劭曰在高河之陽孔穎達

春秋左傳正義曰今案高陽無此水也水源皆出于山其出平地者皆是山中平地燕趙之界無泉出者未知

杜言何所案據蓋孔氏不知此濡水之所出觀酈注自有泉源其後名曰邠水又謂之南濡也然杜註以為出

高陽則非東北至河間鄭縣入易水是濡水與虘池涇易互

舉通稱矣地理志曰博水東至高易入河博水又東北

徐水注之水西出廣昌縣東南大嶺下世謂之廣昌嶺

嶺高四十餘里二十里中委折五迴方能達其上頂故

嶺有五迴之名寰宇記滿城縣下引水經注云五迴山南七里有關雞臺傳云燕太子丹關雞

于此今本無之下望層山盛若蟻垤實兼孤山之稱亦峻嶮也

徐水三源奇發齊瀉一澗東流北轉逕東山下水西有

御射碑徐水又北流西屈逕南巖下水陰又有一碑徐

水又隨山南轉逕東巖下水際又有一碑凡此三銘皆

翼對層巒巖鄣深高壁立霞峙石文云皇帝以太延元

年十二月車駕東巡逕五迴之嶮遂覽崇岸之竦峙乃

停駕路側援弓而射之飛矢踰于巖山一清按此下有缺文寰宇記滿

城縣五迴山引此碑云飛矢踰于巖山三百餘步後鎮

軍將軍定州刺史樂良公乞文于射所立碑中山安喜

賈聰書足補此注之逸刊石用讚元功夾碑竝有層臺二所即御

射處也碑陰皆列樹碑官名徐水東北屈逕郎山又屈

逕其山南衆岑競舉若豎鳥翹立石嶄巖亦如劍杪極

地險之崇峭漢武之世戾太子以巫蠱出奔其子遠遁

斯山故世有郎山之名山南有郎山君碑事具于文全氏

曰此是謬說漢燕刺王之墓徐水又逕郎山君中子觸

鋒將軍廟南廟前有碑晉惠帝永康元年八月十四日

壬寅發詔錫君父子法祠其碑劉曜光初七年全氏曰

碑何以有劉曜前頓邱太守郎宣北平太守陽平邑振

紀年不可曉也等其修舊碑刻石樹頌焉徐水又逕北平縣縣界有漢

熹平四年幽冀二州以戊子詔書遣冀州從事王球幽

州從事張眼郡縣分境立石標界具揭石文矣徐水又

東南流歷石門中世俗謂之龍門也其山上合下開開

處高六丈飛水歷其間南出乘崖傾瀾泄注七丈有餘

湲盪之音奇為壯猛觸石成井水深不測素波白激濤

襄四陸瞰之者驚神臨之者駭魄矣東南出山逕其城

中有故碑是太白君碑郎山君之元子也其水又東流

漢光武追銅馬五幡于北平破之順水北乘勝追北為

其所敗短兵相接光武自投崖下遇突騎王豐於是授

馬進保范陽順水蓋徐水之別名也後漢書光武帝紀

進方輿紀要作退保范徐水又東逕蒲城北一清按蒲

陽是矣此傳刻之誤不能識其受氏之故或以為秦邑又以為張蒼封北平

侯子孫滿邑因名皆燕說也新唐書地理志太平寰宇

記竝云唐天寶元年始立是邑不知元魏時已有蒲城

之號善長生于拓跋朝其言非謬元和志云蒲城縣本漢北平縣地後魏于此置永樂縣天寶元年改為蒲城以縣北故蒲城為名夫曰故蒲城則非自唐始矣蒲城之稱惟元和志及舊唐書同于酈注其他紀載莫不從滿城之訛千年大惑誰復祛之章懷後漢書注云前書音義曰蒲陽山蒲水所出在今定州北平縣西又云北平縣屬中山國今易州永樂縣也又云東觀漢記作蒲本多作滿字者誤也北史魏陳雷王虔傳兄觀從平中山以功賜爵蒲城侯觀又東逕清苑城又東南與沈水此益信予言之有徵矣

合水出蒲城西俗謂之泉頭水也地理志曰北平縣有

沈水東入河即是水也全氏曰按班志無沈水疑是脫文寰宇記沈水在清苑縣北

東逕其城又東南左入徐水地理志曰東至高陽入河

今不能也一清按漢志中山國北平縣徐水東至高陽入博又望都縣博水東至高陽入河蓋徐水合博水以入河也下文

引班志仍作入于博徐水又東左合曹水水出西北

朔寧縣曹河澤東南流左合岐山之水水出岐山東逕

邢安城北又東南入曹河曹水又東南逕北新城縣故

城南又逕北新城縣故城北王莽之朔平縣也曹水又

東入于徐水徐水又東南逕一故城北俗謂之祭過城

所未詳也一清按寰宇記引輿地志云樊輿城西南隅有聖女祠女姓薛字義姜鉅鹿人嫁為樊輿

王文妻死于此城之隅就而祭之俗名祭隅城然則是城即樊輿縣之故城也道元以祭隅為祭過而未詳

得樂氏之書徐水又東流入博水地理志曰徐水出北

其義始明也

平東至高陽入于博又東入涇地理志曰博水自望都

東至高陽入于河

又東北入于易

滹水又東北逕依城北世謂之依城河地說無依城之名卽古葛城也郡國志曰高陽有葛城燕以與趙者也滹水又東北逕阿陵縣故城東王莽之阿陸也建武二年更封左將軍任光爲侯國滹水東北至長城注于易水者也

補滹沱水

禹貢錐指曰禹主名山川曲陽以下之滹本名恒靈壽以下之滹沱本名衛其出高是泰戲者則恒衛之別源自周禮以虜池嘔夷爲并州之川其名著而恒衛之名遂隱矣又曰或問恒衛滹沱漢志明列爲四水子謂

恒卽滹衛卽滹沱亦有所據乎曰有之水經注云滹水東過上曲陽縣北恒水從西來注之自下滹水兼納恒川之通稱卽禹貢所謂恒衛旣從也此非恒卽滹之明證耶水經無滹沱之目見濁漳易滹巨馬諸篇中僅一二語故衛水無考然酈注凡二水合流言自下互受通稱者不可枚舉則滹沱受衛之後亦得通稱衛水可知也又曰滹沱大川也水經當自爲一篇頃閱寰宇記鎮州真定縣蒲澤下引水經注云滹沱河水東逕常山城北又東南爲蒲澤濟水有梁焉俗謂之蒲澤口又滋水下引水經云滋水又東至新市縣入滹沱河又深州饒

陽縣枯白馬渠下引水經云滹沱河又東有白馬渠出焉又瀛州河間縣大浦淀下引水經注云大浦淀下導陂溝競奔咸注滹沱是故人因決入之處謂之百道口此四條檢今本無之則似水經元有滹沱水篇宋初尙存而其後散逸滹沱原委不可得詳惜哉一清按滹沱水篇失亡猶幸有宋初原本見于載籍得以尋其川脈第東樵所引寰宇記之文尙有未盡謹補綴之如左忻州秀容縣下引注水經云滹沱南歷忻中口俯會忻川水水出西管涔山東也程侯山下引注水經云忻川東歷程侯北山山甚層銳其下舊有採金處俗謂之金山

九域志忻州古跡引水經注云程侯北山下有採金穴樂記處字疑穴字之誤又定襄縣三會水下引水經云三會水出九原縣西東入滹沱水逕定襄界又代州雁門縣句注下引水經云雁門郡北對句注東陘其南九塞之一也晉咸寧元年句注碑曰蓋北方之險有盧龍飛狐句注爲之首天下之阻所以分別外內也漢高祖欲伐匈奴不從婁敬之說械繫于廣武遂踰句注困於平城謂此處也漢志雁門郡下云句注在陰館北太原郡廣武縣下云河主賈屋山在北河主是句注之誤又龍泉下引注水經云龍泉出雁門縣平地其大三輪泉

源沸湧騰波奮發以巨石投之輒噴出亦云潛通燕京山之天池也方輿紀要雁門下云龍躍泉水經注謂之雲龍泉相傳與靜樂縣之天池潛通較樂記所引多一雲字又五臺縣五臺山下引水經注云五臺山五巒巍然故謂之五臺山晉永嘉三年雁門郡後人縣五百餘家避亂入此山見山人爲之先驅因而不返遂寧巖野往還之士稀有望見其村居者至詣尋訪莫知所在故俗人謂此山爲仙者之都矣中臺之頂方三里近西北陬有一泉水不流謂之太華泉蓋五臺之層秀仙經云此山名紫府常有紫氣仙人居之內經以爲清涼山御

覽引此注云其北臺之上冬夏常冰雪不可居文殊師利常鎮毒龍之所今多佛寺四方僧徒善信之士多禮焉又聖人阜下引水經注云滹沱水東逕聖人阜阜下有泉泉側石上有二手跡其西復有二脚跡甚大莫窮所自在縣西四十八里又云仙人山在五臺縣東南五十里石岫上有人坐跡山腹石上有手跡山下石上有雙脚跡皆西向立初學記引注水經曰代州專池水西注五臺專池卽虜池之誤又思陽水東有獨山山上有崑崙上有坐跡山腹石上有兩手迹山下石上有兩脚跡俗名之曰仙人山也據此則樂記所稱仙人山亦是

酈注原文而思陽水一語尤足補其闕逸魏書地形志肆州永安郡驢夷縣有思陽城蓋因水以得名故魏昌城下引水經云李克書曰魏文侯時克爲中山相苦陘之吏上計而入多其前克曰苦陘上無山原林麓之饒下無谿谷牛馬之息而入多其前是苦吾百姓遂執而免之漢光武時封大將軍杜茂爲苦陘侯漢章帝北巡改曰漢昌至魏文帝改漢昌爲魏昌城又鎮州行唐縣輪井水下引水經注云行唐城上西南隅有大井若輪水深不測王山祠下引水經云行唐城內北門東側祠後有神女廟廟前有碑其文云王山將軍故燕薊之神

童後爲城神聖女者此土華族石神夫人之元女趙武靈王初營斯邑城彌載不立聖女發歎應與人俱遂妃神童潛刊貞石百堵皆興不日而就故此神後之靈應不泯焉莫州任邱縣狐狸淀下引水經注云鄭縣東南隅水有狐狸淀俗亦謂掘鯉淀非也滹沱水篇之殘簡斷文見於寰宇記者如此爲之隨方辨證焉

補
派水

一清按水經本有派水篇今失亡矣寰宇記定州安喜縣派水下引水經注云派水歷天井澤南流所播爲澤俗名爲天井淀初學記引水經注云定州派水北流逕

大核山大核山疑是大派山之訛大派山在今阜平縣西北五里其東又有小派山以派河所經得名說文派水出雁門後人戍夫山東北入海按山海經郭璞註曰今滹沱水出雁門鹵城縣南武夫山戍夫武夫皆泰戲之一名顧祖禹曰蓋以滹沱為卽派水也此說非是蓋派水與滹沱同出一山耳派水源見說文尾見本注其中所歷之道僅有定州一語較之他篇脫失尤甚

補滋水

一清按方輿紀要山西蔚州靈邱縣下云山海經云高是之山滋水出焉滋水在縣北水經注滋水逕枚迴嶺

懸流五丈湍激之聲震動山谷元和志滋水出靈邱縣西南枚迴山懸河五丈湍激之聲響動山谷樵棧之士咸由此渡巨木淪湑久乃方出或落崖石無不粉碎也土地記云枚迴嶺與高是山連麓接勢李吉甫所引疑是酈注原文

紀要又云石銘陁在縣西水經注滋水逕枚迴嶺東南過石銘陁有石銘其上云冀州北界石銘陁亦見滄水注滋水與滄水發源最近故其事兩隸而班固地理志許慎說文俱謂滋水出牛飲山白陁今漢書作陸字誤當從說文作陁

谷在南行唐今行唐西去靈邱四百餘里水源安得便出於此名勝志行唐縣下引水經注云滋水至行唐縣

鹿水出焉謂之木刀溝入滹沱河寰宇記真定縣下引水經云滋水又東至新市縣入滹沱河又鎮州鼓城縣下云雷源中山記雷河溝水源出鼓城縣名勝志晉州下引水經注云滹沱水流入雷河溝水過舊曲陽北據此則衛水與滋水通波沿注隨地易稱矣今山西廣靈縣有滋水流爲壺流河亦名葫蘆河元和志寰宇記謂之瓠瓠河云上槽狹下槽闊有似瓠瓠故名亦謂嘔夷河蓋與滹水道近也而其下流則北入于桑乾疑與出行唐之滋水有別然山海經本云高是之山滋水出焉而南流注於滹沱則當日滋水惟南入滹沱不北入桑

乾不知何時分一支北流今酈注旣亡無從可證又嵐州紇真山夏恒積雪鳥雀死者一日千數寰宇記朔州鄴陽縣下引冀州圖云紇真山在城東北三十里登之望桑乾代郡數百里內宛然夏恒積雪彼人語曰紇真山頭凍殺雀何不飛去生處樂紇真山卽紇干山虜語紇真華言千里二語唐昭宗嘗稱之蓋古謠諺也又祁州無極縣故安城下引水經云故安城卽魏之安鄉城魏志云明帝太和元年封外祖甄逸爲安鄉侯嫡孫象襲爵青龍二年追諡后兄儼爲安鄉侯卽此城也故新城下引水經云後魏太武帝南巡行宮築亦曰資城

滋亦

作資又作咨此城因滋水所經得名水經本有滋水篇今脫亡爾

水經注釋卷十一終

水經注釋卷十二

仁和趙一清誠夫錄

聖水

巨馬水

聖水出上谷

一清按此條經文疑有脫誤方輿紀要房山縣西大房山古碑云幽冀之奧室也山下有

聖水泉西南有伏龍穴一名龍城峪湯泉出焉又有孔水洞在山之東北懸崖千尺石竇如門深不可測與酈氏注所云畧皆彷彿房山縣本漢良鄉范陽二縣地並屬涿郡又兼得廣陽國之薊縣于上谷無與漢上谷郡治沮陽縣其故城在今保安州東古涿鹿之地濕水注云涿水枝分入匈奴者為涿耶水而是篇注云在上谷為涿耶水應劭以為出上谷涿鹿縣是已下文注云聖水南流歷縣西轉即良鄉縣也

故燕地秦始皇二十三年置上谷郡王隱晉書地道志

曰郡在谷之頭故因以上谷名焉王莽改名朔調也水

出郡之西南聖水谷東南流逕大防嶺之東首山下有石穴東北洞開高廣四五丈入穴轉更崇深穴中有水者舊傳言昔有沙門釋惠彌者好精物隱嘗燐火尋之傍水入穴三里有餘穴分爲二一穴殊小西北出不知趣詣一穴西南出入水經五六日方還又不測窮深其水夏冷冬溫春秋有白魚出穴數日而返人有採捕食者美珍常味蓋亦丙穴嘉魚之流類也是水東北流入聖水聖水又東逕玉石山謂之玉石口山多珉玉燕石故以玉石名之其水伏流里餘潛源東出又東頽波瀉澗一丈有餘屈而南流也

東過良鄉縣南

聖水南流歷縣西轉又南逕良鄉縣故城西王莽之廣陽也有防水注之水出縣西北大防山南而東南流逕羊頭阜下俗謂之羊頭溪其水又東南流至縣東入聖水聖水又南與樂水合水出縣西北大防山南東南流歷縣西而東南流注聖水又東逕其縣故城南又東逕聖聚南蓋藉水而懷稱也又東與俠河合水出良鄉縣西甘泉原東谷東逕西鄉縣故城北王莽之移風也世謂之都鄉城按地理志涿郡有西鄉縣而無都鄉城蓋世傳之非也又東逕良鄉城南又東北注聖水世謂之

挾活河又名之曰非潔之溝也

又東過長鄉縣北

一清按晉志范陽國有長鄉縣魏志作長鄉全氏曰當是陽鄉細玩注文可見

聖水自涿縣東與桃水合首受涑水於徐城東南良鄉

西分垣水世謂之南涉溝即桃水也東逕迺縣北又東

逕涿縣故城下與涿水合世以為涿水亦謂之桃水水

出涿縣故城西南奇溝東八里大坎下數泉同發東逕

桃仁墟北或曰因水以名墟則是桃水也或曰終仁之

故居非桃仁也

一清按桃仁乃高雲倖臣墟以人得名又傳是終仁之故居故云非桃仁也今

本誤以桃仁為桃水文義遂難通曉余按地理志桃水上承涑水此水所

發不與志同謂終為是又東北與樂堆泉合水出堆東

東南流注于涿水涿水又東北逕涿縣故城西流注于

桃應劭曰涿郡故燕漢高帝六年置其南有涿水蓋氏

焉闕駟亦言是矣今于涿城南無水以應之所有惟西

南有是水矣應劭又云涿水出上谷涿鹿縣余按涿水

自涿鹿東注灤水灤水東南逕廣陽郡與涿郡分水漢

高祖六年分燕置涿郡涿之為名當受涿水通稱矣故

郡縣氏之但物理潛通所在分發故在上谷為涿耶水

山川阻闕竝無浴注之理所在受名者皆是經隱顯相

關遙情受用以此推之事或近矣而非所安也桃水又

東逕涿縣故城北王莽更名垣翰

一清按漢志莽改涿郡曰垣翰而涿縣下

無說此當是垣翰亭落亭字漢志注亦闕此文晉太始元年改曰范陽郡今郡

理涿縣故城城內東北角有晉康王碑城東有范陽王

司馬虓廟碑桃水又東北與垣水會水上分涑水於良

鄉縣之桃水世謂之北涉溝故應劭曰垣水出良鄉東

逕垣縣故城北史記音義曰河間有武垣縣涿有垣縣

漢景帝中三年封匈奴降王賜為侯國一清按漢志垣

垣縣屬涿郡續志河間國武垣故屬涿今注所引音義

云云豈別有說乎又史表垣侯賜索隱曰縣名屬河東

則非涿之武垣可知善長又誤武垣城在河間府西南

三十八里去涿甚遠水道亦無相通之處恐當涿郡又

自有垣縣也一統志垣城在涿州北王莽之垣翰亭矣世謂之頃城非也

又東逕頃一清按此亦地名也故有頃上言一清按三

下有脫文世名之頃前河又東洛水注之水上承鳴澤渚渚方一

十五里漢武帝元封四年行幸鳴澤者也服虔曰澤名

在迺縣北界即此澤矣西則獨樹水注之水出迺縣北

山東入渚北有甘泉水注之出良鄉西山東南逕西鄉

城西而南注鳴澤渚又東逕西鄉城南又東逕垣縣而

南入垣水垣水又東逕涿縣北東流注于桃故應劭曰

垣水東入桃闕駟曰至陽鄉注之漢志涿郡良鄉縣垣

一清按南東今按經脈而不能屈也桃水東入陽鄉東

注聖水漢志涿郡涿縣桃水受首涑水分東至安次入

河一清按蓋由聖水以注于巨馬河也受首當受首聖水又東廣陽水注之水出小廣陽西山東逕廣

陽縣故城北又東福祿水注焉水出西山東南逕廣陽縣故城南東入廣陽水亂流東南至陽鄉縣右注聖水聖水又東南逕陽鄉城西不逕其北矣縣故涿之陽亭也地理風俗記曰涿縣東五十里有陽鄉亭後分爲縣王莽時更名章武卽長鄉縣也按太康地記涿有長鄉而無陽鄉矣聖水又東逕長興沈氏曰疑是長鄉城南又東逕方城縣故城李牧伐燕取方城是也魏封劉放爲侯國聖水又東左會白祀溝溝水出廣陽縣之婁城東東南流左合婁城水水出平地導源東南流右注白祀水亂流東南逕常道城西故鄉亭也西去長鄉城四十里魏

少帝璜甘露三年所封也

一清按魏少帝璜以甘露三年封爲常道鄉公甘露是

貴鄉公紀年此句詞意甚晦

又東南入聖水聖水又東南逕韓城東

詩韓奕章曰溥彼韓城燕師所完王錫韓侯其追其貊奄受北國鄭元曰周封韓侯居韓城爲侯伯言爲獫夷所逼稍稍東遷也王肅曰今涿郡方城縣有韓侯城世謂之寒號城非也聖水又東南流右會清淀水水發西淀東流注聖水謂之劉公口也

又東過安次縣南東入于海

聖水又東逕勃海安次縣故城南漢桓帝中平二年封

荊州刺史王敏爲侯國

一清按桓帝字誤後漢書靈帝紀中平三年江夏兵趙慈反殺

南陽太守秦頡六月荊州刺史王敏討趙慈斬之蓋以有功封也二年亦是三年之誤沈氏校本摘中平非桓帝紀年蓋又東南流注于巨馬河而不達于海也考之不盡

巨馬河出代郡廣昌縣涑山

即涑水也有二源俱發涑山東逕廣昌縣故城南王莽之廣屏矣魏封樂進為侯國涑水又東北逕西射魚城東南而東北流又逕東射魚城南又屈逕其城東竹書紀年曰荀瑤伐中山取窮魚之邱窮射字相類疑即此城也所未詳矣涑水又逕三女亭西又逕樓亭北左屬白澗溪水有二源合注一川川石皓然望同積雪故以物色受名其水又東北流謂之石槽水伏流地下溢則

通津委注謂之白澗口涑水又東北桑谷水注之水南發桑溪北注涑水涑水又北逕小巒東又東逕大巒南蓋霍原隱居教授處也徐廣云原隱居廣陽山教授數千人為王浚所害雖千古世懸猶表二巒之稱既無碑頌竟不知定誰居也涑水又東北歷紫石溪口與紫水合水北出聖人城北大亘下東南流左會壘砢溪水蓋山崩委澗積石淪隍故溪澗受其名矣水出東北西南流注紫石溪水紫石溪水又逕聖人城東又東南右會擔車水水出擔車礪東南流逕聖人城南南流注紫石水又南注于涑水涑水又東南逕榆城南又屈逕其城

東謂之榆城河涑水又南逕藏刀山下層巖壁立直上
 于霄遠望崖側有若積刀鏤鏤相比咸悉西首涑水東
 逕徐城北沙溝出焉世謂之沙溝水又東督亢溝出焉
 一水東南流即督亢溝也一水西南出即涑水故瀆矣
 水盛則長津宏注水耗則通波潛伏重源顯於迺縣舊
 則川矣

東過迺縣北

涑水上承故瀆于縣北垂重源再發結為長潭潭廣百
 許步長數百步左右翼帶涓流控引自成淵渚長川漫
 下一十許步東南流逕迺縣故城東漢景帝中三年以

封匈奴降王隆疆

一清按漢表作陸疆此從史表

為侯國王莽更名迺

屏也謂之巨馬河亦曰渠水也又東南流袁本初遣別
 將崔巨業攻固安不下退還公孫瓚追擊之於巨馬水

死者六七千人即此水也又東南逕范陽縣故城北易

水注之

寰宇記易州易縣加夷城下引水經云巨馬水流逕加夷山即睽子于山中養無目父母之所

也今本無之

又東南過容城縣北

巨馬水又東酈亭溝水注之水上承督亢溝水於迺縣

東東南流歷紫淵東余六世祖樂浪府君自涿之先賢

鄉爰宅其陰西帶巨川東翼茲水枝流津通纏絡墟圃

匪直田漁之贍可懷信爲遊神之勝處也其水東南流
又名之爲酈亭溝其水又西南轉歷大利亭南入巨馬
水又東逕容城縣故城北又東督亢溝水注之水上承
涑水于涑谷引之則長津委注過之則微川輟流水德
含和變通在我東南流逕迺縣北又東逕涿縣酈亭樓
桑里南卽劉備之舊里也又東逕督亢澤澤苞方城縣
縣故屬廣陽後隸于涿郡國志曰縣有督亢亭孫暢之
述畫有督亢地圖言燕太子丹使荆軻齎入秦秦王殺
軻圖亦絕滅地理書上古聖賢冢地記曰督亢地在涿
郡今故安縣南有督亢陌幽州南界也風俗通曰沆漭

也言乎淫淫漭漭無厓際也沆澤之無水斥鹵之謂也
其水自澤枝分東逕涿縣故城南又東逕漢侍中盧植
墓南又東散爲澤渚督亢澤也北屈匯于桃水督亢水
又南謂之白溝水南逕廣陽亭西而南合枝溝溝水西
受巨馬河東出爲枝溝又東注白溝白溝又南入于巨
馬河巨馬河又東南逕益昌縣濩澱水右注之水上承
濩陂於臨鄉縣故城西東南逕臨鄉城南漢封廣陽頃
王子雲爲侯國一清按漢表雲以元帝初元五年封地理風俗記曰方城
南十里有臨鄉城故縣也淀水又東南逕益昌縣故城
西南入巨馬水巨馬水東逕益昌縣故城南漢封廣陽

頃王子嬰為侯國

一清按漢表嬰以元帝永光三年封

王莽之有秩也地

理風俗記曰方城縣東八十里有益昌城故縣也又東

八丈溝水注之水出安次縣東北平地東南逕安次城

東東南逕泉州縣故城西又南右合虜池河枯溝溝自

安次西北東逕常道城東安次縣故城西晉司空劉琨

所守以拒石勒也又東南至泉州縣西南東入八丈溝

又南入巨馬河亂流東注也

又東過渤海東平舒縣北東入于海

地理志曰涑水東南至容城入于河即濡水也蓋互以

明會矣巨馬水於平舒城北南入于虜池而同歸于海

也

水經注釋卷十二終

水經注釋卷十三

灤水

仁和趙一清誠夫錄

灤水出雁門陰館縣東北過代郡桑乾縣南

俗一清按灤水

濕水誤也資治通鑑晉愍帝紀建興元年代公又作新平

城于灤水之陽胡身之注云班固地理志右北平俊靡縣

灤水南至無終東入庚師古曰灤力水翻又音郎賄翻酈

道元水經注庚水與鮑邱水合俊靡在東與平城相去甚

遠新平城不在此灤水之陽也據魏書道武帝西如馬邑

觀灤源則灤水蓋出于馬邑而東北流逕平城之南也酈

道元魏人也其注水經敘代都之事宜詳初不言平城有

灤水但言灤水逕平城南耳班志雁門陰館樓煩鄉累

頭山治水所出東至泉州入海師古曰灤音力追翻治音

弋之翻竊謂水出累頭山疑當時亦有累水之名師古音

從平聲音相近也意道元所謂灤水即灤水也丁度集韻

灤灤灤三字同註云水出雁門則亦有見於此矣灤類篇

水經注釋

卷十三

一東潛趙氏定本

音魯水翻蓋梅磻既不知灤水之非灤水又不識濕字之義宜其輾轉支離反覆而不可通也說文灤水出雁門陰館累頭山東入海或曰治水也从水壘聲力軌切其言與漢志合右北平俊靡東南入庚从水壘聲力軌切其言與漢志合此篇之水是灤水非灤水也而丁度以為灤灤同出雁門是為悠謬也至于濕本濟濕之濕音他合翻說文作濕隸改曰為田又省一糸作灤字而濕字反相沿作燥溼之溼矣灤水導源累頭山故集韻又同出灤灤字也灤為灤之省文然已混于濟灤之灤矣宜別白之

灤水出於累頭山一曰治水泉發於山側沿波歷澗東

北流出山逕陰館縣故城西縣故樓煩鄉也漢景帝後

三年置王莽更名富臧矣一清按漢志作富代魏天安三年齊平

徙其民於縣立平齊郡一清按天安是魏獻文帝年號

皇興不當云三年也方輿紀要云平齊城在大同府西二十里漢平城縣地宋志秦始五年魏人徙升城歷城

民望于桑乾因立平齊郡以處之秦始五年正皇興之三年也然于天安之號又不符矣顧氏所引又不見于沈約志事在魏書慕容白曜崔元伯劉休賓房崇吉諸傳隋書地理志郡尋廢故地形志無此郡也灤水

又東北流左會桑乾水縣西北上平洪源七輪謂之桑

乾泉即溱涑水者也耆老云其水潛承太原汾陽縣北

通燕京山之天池池在山原之上世謂之天池方八里

餘元和志池週迴八里其水澄渟鏡淨潭而不流若安定朝那之

湫淵也清水流潭皎焉冲照池中曾無片草及其風籟

有淪輒有小鳥翠色投淵銜出若會稽之耘鳥也其水

陽焯不耗陰霖不濫無能測其淵深也古老相傳言嘗

有人乘車於池側忽過大風飄之於水有人獲其輪於

桑乾泉故知二水潛流通注矣池東隔阜又有一石池
 方可五六十步清深鏡潔不異天池桑乾水自源東南
 流右會馬邑川水水出馬邑西川俗謂之磨川矣蓋狄
 語音譌馬磨聲相近故耳其水東逕馬邑縣故城南干
 寶搜神記曰昔秦人築城於武周塞內以備胡城將成
 而崩者數矣有馬馳走一地周旋反覆父老異之因依
 以築城城乃不崩遂名之為馬邑或以為代之馬城也
方輿紀要馬城在大同府東北境漢縣屬代郡東部都
 尉治此東漢元初六年鮮卑寇馬城塞鄧遵擊破之魏
 明帝太和二年鮮卑軻比能圍護烏桓校尉田豫于
 馬城即此十三州志馬城在高柳東二百四十里
 諸
 記紛競未識所是漢以斯邑封韓王信後為匈奴所圍

信遂降之王莽更名之曰章昭其水東流注桑乾水桑
 乾水又東南流水南有故城東北臨河又東南右合灤
 水亂流枝水南分桑乾水又東左合武周塞水水出故
 城東南流出山逕日沒城南蓋夕陽西頽戎車所薄之
 城故也東有日中城城東又有早起城亦曰食時城在
 黃瓜阜北曲中其水又東流右注桑乾水桑乾水又東
 南逕黃瓜阜曲西又屈逕其堆南徐廣曰猗盧廢嫡子
 曰利孫于黃瓜堆者也全氏曰道元身為拓跋臣子其
 不敢斥言六修之變明矣徐廣
 後人所加 又東右合枝津枝津上承桑乾河東南流
 逕桑乾郡北大魏因水以立郡受厥稱焉又東北左合

夏屋山水水南出夏屋山之東谿西北流逕故城北所未詳也又西北入桑乾枝水桑乾枝水又東流長津委浪通結兩湖東湖西浦淵潭相接水至清深晨鳧夕雁泛濫其上黛甲素鱗潛躍其下俯仰池潭意深魚鳥所寡惟良木耳俗謂之南池池北對涅陶縣之故城南故曰南池也池水又東北注桑乾水與灤水竝受通稱矣灤水又東北逕巨魏亭西蓋皇魏天賜三年之所經建也灤水又東北逕白狼堆南魏烈祖道武皇帝於是遇白狼之瑞故斯阜納稱焉阜上有故宮廟樓榭基雉尙崇每至鷹隼之秋羽獵之日肆閱清野爲升眺之逸地

矣灤水又東流四十九里東逕巨魏亭北又東崞川水

注之水南出崞山縣故城南

一清按兩漢志俱作崞縣地形志恒州繁時郡領縣

日崞山則正道元時新制不得云故城也蓋其率筆耳

王莽之崞張也縣南面元

岳右背崞山處二山之中故以崞張爲名矣其水又西

出山謂之崞口北流逕繁時縣故城東王莽之當要也

又北逕巨魏亭又北逕劇陽縣故城西王莽之善陽也

按十三州志曰在陰館縣東北一百三里其水又東注

于灤水灤水又東逕班氏縣南如渾水注之水出涼城

旋鴻縣

一清按魏書地形志梁城郡旋鴻縣註云一本作祗鴻與此異文疑是史誤

西南五

十餘里東流逕故城南北俗謂之獨谷孤城水亦卽名

焉東合旋鴻池水水出旋鴻縣東山下水積成池北引

魚水水出魚谿南流注池池水吐納川流以成巨沼東

西二里南北四里北對涼川城之南池池方五十里俗

名乞伏袁河雖隔越山阜鳥道不遠雲霞之間常有朱氏

謀瑋箋云下脫少數字西南流逕旋鴻縣南右合如渾水一清按

宇記雲中縣下引水經注曰雲中銜河水西南合桑是乾河水今本無之名勝志引郡國志以為如渾水也

總二水之名矣如渾水又東南流逕永固縣縣以太和

中因山堂之目以氏縣也右會羊水水出平城縣之西

苑外武周塞北出東轉逕燕昌城南按燕書建興十年

慕容寶自河西還軍敗於參合死者六萬人十一年垂

衆北至參合見積骸如山設祭弔之死者父兄皆號泣

六軍哀慟垂慚憤嘔血因而寢疾焉舉過平城北四十

里疾篤築燕昌城而還即此城也北俗謂之老公城羊

水又東注于如渾水亂流逕方嶺上有文明太皇太后

陵陵之東北有高祖陵二陵之南有永固堂堂之四周

隅雉列榭階欄檻及扉戶梁壁椽瓦悉文石也檐前四

柱採洛陽之八風谷黑石為之雕鏤隱起以金銀間雲

雉有若錦焉堂之內外四側結兩石趺張青石屏風以

文石為緣竝隱起忠孝之容題刻貞順之名廟前鐫石

為碑獸碑石至佳左右列柏四周迷禽闔日院外西側

有思遠靈圖圖之西有齋堂南門表二石闕闕下斬山

累結御路下望靈泉宮池皎若圓鏡矣羊水又東注清一

按五字重如渾水又南至靈泉池枝津東南注池池東

西一百步南北二百步池渚舊名白楊泉泉上出白楊

樹因以名焉其猶長楊五柞之流稱矣南面舊京北背

方嶺左右山原亭觀繡峙方湖反景若三山之倒水下

如渾水又南逕北宮下舊宮人作薄所在一清按作薄

作部沈約宋書亦作作部均沿習之非據漢書宣帝紀

云為娶暴室嗇夫許廣漢女應劭曰暴室宮人獄也今

日薄室師古曰暴室者掖庭主織作染練之署故謂之

暴室取暴曬為名或云薄室者薄亦暴也俗語亦云薄

曬蓋暴室織務既多因置獄官主治其罪人故往往云

暴室獄耳然本非獄名應說失之矣此云作薄與穀水

篇注薄隸諸徒咸敬之文皆即薄如渾水又南分為二

室之薄或又訛作簿字者誤也

水一水西出南屈入北苑中歷諸池沼又南逕虎圈東

魏太平眞君五年成之以牢虎也季秋之月聖上親御

圈上勅虎士効力於其下事同奔戎生制猛獸即詩所

謂袒裼暴虎獻于公所也故魏有捍虎圖也庾林曰後

獻字洛誠晉陽人姿貌偉麗文明太后臨朝獻見幸為

侍中吏部尚書愛寵日隆太和二年高祖及太后率百

僚臨虎圈有逸虎登門閣道幾至御坐侍御驚靡獻執

戟禦之虎乃退親任轉重進爵中山王獻薨太后親臨

哀慟葬城東高祖登城樓望之立祠都南又詔褒獻圖

其捍虎狀于諸殿高允為讚京師士女造新聲而弦歌

之名曰中山樂善長託喻奔戎又逕平城西郭內魏太

蓋晦其事微露捍虎亦迂詞也

常七年所城也城周西郭外有郊天壇壇之東側有郊

天碑建興四年立其水又南屈逕平城縣故城南史記曰高帝先至平城史記音義曰在雁門卽此縣矣王莽之平順也魏天興二年遷都於此太和十六年破太華安昌諸殿造太極殿東西堂及朝堂夾建象魏乾元中陽端門東西二掖門雲龍神虎中華諸門皆飾以觀閣東堂東接太和殿殿之東堦下有一碑太和中立石是洛陽八風谷之緇石也殿之東北接紫宮寺南對承賢門門南卽皇信堂堂之四周圖古聖忠臣烈士之容刊題其側是辯章郎彭城張僧達樂安蔣少遊于一清按下有脫文魏書藝術傳蔣少遊樂安博昌人慕容白曜之平東陽見俘于平城克平齊戶後配雲中爲兵性機巧頗能

刻畫高祖文明太后常因密宴謂百官曰本謂少遊作師耳高允老公乃言其人士驟被引命屑屑禁闥以規矩刻績爲務因此大蒙恩錫後于平城將營太廟太極殿遣少遊乘傳詣洛準量魏晉基址少遊有文藻而不得伸其才用恒以剖劂繩尺碎劇匆匆徙倚園湖城殿之側識者爲之慨嘆而乃坦而爲已任不告疲恥景明二年卒贈龍驤將軍青州刺史堂南對白臺臺甚高廣臺基四周列壁

閣道自內而升國之圖籙秘籍悉積其下臺西卽朱明閣直待之官出入所由也其水夾御路南流逕蓬臺西魏神瑞三年又建白樓樓甚高竦加觀榭於其上表裏飾以石粉皜曜建素赭白綺分故世謂之白樓也後置大鼓於其上晨昏伐以千椎爲城里諸門啓閉之候謂之戒晨鼓也又南逕皇舅寺西是太師昌黎王馮晉國

所造有五層浮圖其神圖象皆合青石爲之加以金銀
火齊衆綵之上煒煒有精光又南逶出郊郭弱柳蔭街絲楊被
其制甚妙工在寡雙又南遶出郊郭弱柳蔭街絲楊被
浦公私引裂用周圍挽長塘曲池所在布濩故不可得
而論也一水南逕白登山西服虔曰白登臺名也去平
城七里如淳曰平城傍之高城若邱陵矣今平城東十
七里有臺卽白登臺也臺南對罡阜卽白登山也故漢
書稱上遂至平城上白登者也爲匈奴所圍處孫暢之
述畫曰漢高祖被圍七日陳平使能畫作美女送與冒
頓闕氏恐冒頓勝漢其寵必衰說冒頓解圍於此矣其

水又逕寧先宮東獻文帝之爲太上皇也所居故宮矣
宮之東次下有兩石柱是石虎鄴城東門石橋柱也按
柱勒趙建武中造以其石作工妙徙之於此余爲尙書
祠部與宜都王穆羆同拜北郊親所經見柱側悉鏤雲
炬上作蟠螭甚有形勢信爲工巧去子丹碑則遠矣其
水又南逕平城縣故城東司州代尹治皇都洛陽以爲
恒州水左有大道壇廟始光二年少室道士寇謙之所
議建也兼諸嶽廟碑亦多所署立其廟階三成四周欄
檻上階之上以木爲員基令干相枝梧以板砌其上欄
陛承阿上員制如明堂而專室四戶室內有神坐坐右

列玉磬皇輿親降受籙靈壇號曰天師宣揚道式暫重
當時壇之東北舊有靜輪宮魏神廡四年造抑亦柏梁
之流也臺榭高廣超出雲間欲令上延霄客下絕囂浮
太平真君十一年又毀之物不停固白登亦繼褫矣水
右有三層浮圖真容鷲架悉結石也裝制麗質亦盡美
善也東郭外太和中闢人宕昌公鉗耳慶時立祇洹舍
於東罽椽瓦梁棟臺壁櫺陛尊容聖像及床坐軒帳悉
青石也圖制可觀所恨惟列壁合石疎而不密庭中有
祇洹碑碑題大篆非佳耳然京邑帝里佛法豐盛神圖
妙塔桀峙相望法輪東轉茲爲上矣其水自北苑南出

歷京城內河干兩湄太和十年累石結岸夾塘之上雜
樹交蔭郭南結兩石橋橫水爲梁又南逕藉田及藥圃
西明堂東明堂上圓下方四周十二戶九室而不爲重
隅也室外柱內綺井之下施機輪飾縹碧仰象天狀畫
北道之宿焉蓋天也每月隨斗所建之辰轉應天道此
之異古也加靈臺於其上下則引水爲辟雍水側結石
爲塘事準古制是太和中之所經建也如渾水又南與
武周川水會水出縣西南山下二源翼導俱發一山東
北流合成一川北流逕武周縣故城西王莽之桓周也
又東北右合黃水水西出黃阜下東北流聖山之水注

焉水出西山東流注于黃水黃水又東注武周川又東歷故亭北右合火山西谿水水導源火山西北流山上有火井南北六七十步廣減尺許源深不見底炎勢上升常若微雷發響以草爨之則烟騰火發東方朔神異傳云南方有火山焉長四十里廣四五里其中皆生不燼之木晝夜火然暴雨猛風不滅火中有鼠重百斤毛長二尺餘細如絲色白時時出外以水逐而沃之則死取其毛績以爲布謂之火浣布是山亦其類也但卉物則不能然其山以火從地中出故亦名熒臺矣火井東五六尺又東有湯井廣輪與火井相狀熱勢又同以草

內之則不然皆沾濡露結故俗以湯井爲目井東有火井祠以時祀祭焉井北百餘步有東西谷廣十許步南崖下有風穴厥大容人其深不測而穴中肅肅常有微風雖三伏盛暑猶須襲裘寒吹凌人不可暫停而其山出雛鳥形類雅鳥純黑而姣好音與之同績采紺發觜若丹砂性馴良而易附卅童幼子捕而執之曰赤觜鳥亦曰阿雛鳥按爾雅純黑反哺謂之慈鳥小而腹下白不反哺者謂之雅鳥白頸而羣飛者謂之燕鳥大而白頸者謂之蒼鳥爾雅曰鸞斯卑居也孫炎曰卑居楚鳥犍爲舍人以爲壁居說文謂之雅雅楚鳥莊子曰雅賈

矣馬融亦曰賈鳥者也又按瑞應圖有三足鳥赤鳥白鳥之名而無記于此鳥故書其異耳自恆山以北竝有此矣其水又東北流注武周川水武周川水又東南流水側有石祗洹舍竝諸窟室比邱尼所居也其水又東轉逕靈巖南鑿石開山因崖結構眞容巨壯世法所稀山堂水殿烟寺相望林淵錦鏡綴目新眺川水又東南流出山魏土地記曰平城西三十里武周塞口者也自山口枝渠東出入苑漑諸園池苑有洛陽殿殿北有宮館一水自枝渠南流東南出火山水注之水發火山東谿東北流出山山有石炭火之熱同樵炭也又東注武周

川逕平城縣東南流注如渾水又南流逕班氏縣故城

東王莽之班副也

一清按漢志分註引秦地圖書班氏莽曰班副

闕駟十三州

志曰班氏縣在郡西南百里北俗謂之去畱城也如渾

水又東南流注于灤水灤水又東北逕平邑縣故城南

趙獻侯十三年城平邑地理志曰屬代王莽所謂平胡

也十三州志曰城在高柳南百八十里北俗謂之醜寅

城灤水又東逕沙陵南魏金田之地也事同曹武鄴中

定矣

一清按鄴中定未詳三國志注引魏略曰河北始開以王修爲司金中郎將陳黃白異議議不傳而

魏武與修書云初立司金之官又引遏父陶正桑宏羊爲喻續漢書百官志曰本注曰郡國鹽官鐵官本屬司農中興皆屬郡縣迨曹公始置司金中郎將利權悉歸于上矣魏書食貨志云世宗延昌二年秋恆州上言白

登山有銀鑛入石得銀七兩錫三百餘斤其色潔白有
踰上品詔置銀官常令採鑄元魏金田之制殆仿曹氏
歸權于上之意乎金田即銀鑛禹貢揚州貢金
三品叔治黃白異議蓋舍銅而專言金銀也
灤水東

逕狝氏

一清按孟康曰狝音權氏音精

縣故城北王莽更名之曰狝聚

也十三州志曰縣在高柳南百三十里俗謂之苦力干

城矣灤水又東逕道人縣故城南地理志曰王莽之道

仁也地理風俗記曰初築此城有仙人遊其地故因以

為城名矣今城北有淵潭而不注故俗謂之為平湖也

十三州志曰道人城在高柳東北八十里所未詳也灤

水又東逕陽原縣故城南地理志曰代郡之屬縣也北

俗謂之北鄒州城灤水又東流安陽水注之水出縣東

北澤中北俗謂之太拔迴水水自澤東南流注于灤水

又東逕東安陽縣故城北趙惠文王三年封長子章為

代安陽君此即章封邑

一清按史記章是武靈王子酈氏誤記也

王莽之竟

安也地理風俗記曰五原有西安陽故此加東也灤水

東逕昌平縣溫水注之水出南墳下三源俱導合而南

流東北逕

一清按下有脫文

灤水灤水又東逕昌平縣故城北

王莽之長昌也昔牽招為魏鮮卑校尉屯此

按一統志昌平故城

在蔚州北魏太和中置漢昌平縣屬上谷郡今順天府

昌平州界是也今蔚州乃漢代郡地漢時桑乾為代郡

治不應上谷之縣反在其西昌平縣是後魏所僑置水
經注以為即牽招所屯非是地形志平昌郡領昌平縣
天平中置而失太灤水又東北逕桑乾縣故城西又屈
和所置郡縣事也

逕其城北王莽更名之曰安德也魏土地記曰代城北
 九十里有桑乾城城西渡桑乾水去城十里有溫湯療
 疾有驗經言出南非也蓋誤證矣魏任城王彰以建安
 二十三年伐烏丸入涿郡逐北遂至桑乾止於此也灤
 水又東流祁夷水注之水出平舒縣東逕平舒縣之故
 城南澤中史記趙孝成王十九年以汾門予燕易平舒
 徐廣曰平舒在代史記趙世家孝成王十九年趙與燕
 易土以龍兌汾門臨樂與燕燕以葛
 武陽平舒與趙正義曰括地志云故葛城又名西河城
 在瀛州高陽縣西北五十里平舒故城在蔚州靈邱縣
 北九十三里夫既知葛城在高陽則武陽平舒必相去
 不遠先是惠文王二十一年徙漳水武平西二十七年
 徙漳水武平南正義曰括地志云武平亭今名渭城在
 清州文安縣北七十二里是時趙境東逼故燕以三邑

予之易土葛城廢縣今安州治武陽地關平舒今大城
 縣也漢曰東平舒屬勃海郡師古曰代郡有平舒故此
 加東是也徐廣既誤證括地志又因之均為非矣王莽更名之曰平葆後漢世
 祖建武七年封揚武將軍馬成為侯國其水控引衆泉

以成一川魏土地記曰代城西九十里有平舒城西南
 五里代水所出東北流言代水非也祁夷水又東北逕
 蘭亭南又東北逕石門關北舊道出中山故關也又東
 北流水側有故池按魏土地記曰代城西南三十里有
 代王魚池池西北有代王臺東去代城四十里祁夷水
 又東北得飛狐谷即廣野君所謂杜飛狐之口也蘇林
 據酈公之說言在上黨即實非也如淳言在代是矣晉

建興中劉琨自代出飛狐口奔于安次即於此道也魏
 土地記曰代城南四十里有飛狐關關水西北流逕南
 舍亭西又逕句瓌亭西西北注祁夷水祁夷水又東北
 流逕代城西盧植言初築此城板榦一夜自移于此故
 代西南五十里大澤中營城自護結葦為九門於是就
 以為治城圓匝而不方周四十七里開九門更名其故
 城曰東城趙滅代一清按此漢封孝文為代王一清按
郡治桑乾後漢移治高柳漢志代郡下應劭曰故代國
孝文所都非也文帝初封代王都晉陽徙中都未嘗居
代梅福上事曰代谷者恆山在其南北塞在其北谷中
 之地上谷在東代郡在西是其地也王莽更之曰厭狄

亭魏土地記曰城內有二泉一源流出城西門一源流

出城北門二源皆北注代水一清按代城今蔚州治也

代王城也城內有泉二東西分流與道元說合是此文當在東城之下恐後來傳寫倒錯耳 祁夷水

又東北熱水注之水出綾羅澤澤際有熱水亭其水東

北流注祁夷水又東北谷水注之水出昌平縣故城南

又東北入祁夷水祁夷水右會逆水水導源將城東西

北流逕將城北在代城東北一十五里疑即東代矣而

尚傳將城之名盧植曰此城方就而板榦自移劉昭郡

註引干寶搜神記曰代城始築立板榦一旦亡西南移

四五里於澤中自立結葦為外門因就營築焉故其
 城周圍三十五丈為九門故城處呼之以為東城一清
 按魏書李元護傳叔恤為東代郡太守蓋太和遷洛以

後以平城為代郡故以漢代郡之代縣為東代地形志
 代郡秦置孝昌中陷天平二年置領平城太平武周永
 固四縣而無東代郡且後魏時代郡又屬肆州本紀太
 和十一年肆州之代郡民饑靈徵志神麇二年白鹿見
 代郡倒刺山皆故代縣地應劭曰城徙西南去故代五
 十里故名代曰東城或傳書倒錯情用疑焉而無以辨
 之逆水又西流注于祁夷之水逆之為名以西流故也
 祁夷水東北逕青牛淵水自淵東注之者彥云有潛龍
 出於茲浦形類青牛焉故淵潭受名矣潭深不測而水
 周多蓮藕生焉祁夷水又北逕一故城西西去代城五
 十里又疑是代之東城而非所詳也又逕昌平郡東魏
 太和中置西南去故城六十里又北連水一清按黃氏
本作蓮水非

入焉水出雒脊

一清按孟康曰音句無師古
日雒音工頭反脊音莫豆反

縣東西北

流逕雒脊縣故城南又西逕廣昌城南

寰宇記蔚州飛
狐縣下引水經

云廣昌縣有古板殿城今本無之一清按北史魏紀明
元帝永興四年八月壬子幸西宮臨板殿大饗羣臣即
是處魏土地記曰代南二百里有廣昌城南通大嶺即
也

此非也十三州記曰平舒城東九十里有廣平城疑是

城也尋其名狀忖理為非又西逕王莽城南又西到刺

山水注之水出到刺山西山甚層峻未有升其巔者魏

土地記曰代城東五十里有到刺山山上有佳大黃也

一清按寰宇記
云出椒大黃其水北流逕一故亭東城北有石人故

世謂之石人城西北注連水又北逕當城縣故城西高

祖十二年周勃定代斬陳豨于當城即此處也應劭曰當桓都山作城故曰當城也又逕故代東而西北流注祁夷水祁夷水西有隨山山上有神廟謂之女郎祠方俗所祠也祁夷水又北逕桑乾故城東而北流注于灤水地理志曰祁夷水出平舒縣北至桑乾入灤是也全氏

日按鄭康成注職方誤以嘔夷為祁夷而顏師古從之不知班志已自了然蓋嘔夷漚水也故于漚河之下大書曰并州川則其為嘔夷水無疑矣入灤灤水又東北今本漢書作入沽蓋誤字也當作入治

逕石山水口水出南山北流逕空侯城東魏土地記曰代城東北九十里有空侯城者也其水又東北流注灤水灤水又東逕潘縣故城北東合協陽關水水出協溪

魏土地記曰下洛城西南九十里有協陽關關道西通代郡其水東北流歷笄頭山關駟曰笄頭山在潘城南即山也又北逕潘縣故城左會潘泉故瀆瀆舊上承潘泉於潘城中或曰舜所都也魏土地記曰下洛城西南四十里有潘城城西北三里有歷山山上有虞舜廟十三州記曰廣平城東北一百一十里有潘縣地理志曰王莽更名樹武其泉從廣十數步東出城注協陽關水雨盛則通注陽旱則不流唯泝泉而已關水又東北流注于灤水又東逕雍洛城南魏土地記曰下洛城西南二十里有雍洛城桑乾水在城南東流者也灤水又

東逕下洛一清按漢志作下洛縣故城南王莽之下忠也魏燕州

廣甯縣廣甯郡治一清按地形志無此文蓋孝昌後已廢省矣魏書穆罷傳太和十六年除

燕州刺史鎮廣甯即此魏土地記曰去平城五十里城南二百步

有堯廟灤水又東逕高邑亭北又東逕三臺北灤水又

東逕無鄉城北地理風俗記曰燕語呼亡為無一清按亡與無

同詩何有可證也佩觿集河朔謂無曰毛後漢書馮衍傳飢者毛食章懷註云按衍集毛字作無今俗語

猶然者或古亦通乎無鄉似舊俗呼為毛鄉酈故引地理風俗記之文以釋之不然亡無音義竝同何須說得

其城在今直隸保定州南今改宜鄉也一清按地形志東燕州太和

天平中領流民置寄治灤水又東溫泉水注之水上承

幽州宜都城即宜鄉也溫泉於橋山下魏土地記曰下洛城東南四十里有橋

山山下有溫泉泉上有祭堂雕簷華宇被于浦上石池

吐泉湯湯其下炎涼代序是水灼焉無改能治百疾是

使赴者若流池水北流入于灤水灤水又東左得于延

水口水出塞外柔元鎮西長川城南小山山海經曰梁

渠之山無草木多金玉脩水出焉東南流逕且如縣故

城南應劭曰當城西北四十里有且如城故縣也代稱

不拘名號變改校其程郭相去遠矣地理志曰中部都

尉治于延水出縣北塞外即脩水也脩水又東南逕馬

城縣故城北地理志曰東郡都尉治十三州志曰馬城

在高柳東二百四十里俗謂是水為阿頭阿頭出戎方

水經注釋

土俗變名耳又東逕零丁城南右合延鄉水水出縣西
 山東逕延陵縣故城北地理風俗記曰當城西北有延
 陵鄉故縣也俗指謂之琦城川又東逕羅亭又東逕馬
 城北又東注脩水又東南於大甯郡北右注雁門水山
 海經曰雁門之水出于雁門之山雁出其門在高柳北
 高柳在代中其山重巒疊巘霞舉雲高連山隱隱東出
 遼塞其水東南流逕高柳縣故城北舊代郡治秦始皇
 二十三年虜趙王遷以國為郡王莽之所謂厭狄也清
 按此是前漢西部都尉治後漢代郡治此建武十九年世祖封代相堪為侯
 國昔牽招斬韓忠於此處一清按厄林曰魏志牽招傳
韓忠之頭非斷子經之手注

誤也又傳稱遣詣柳城地理志高柳屬代郡柳城屬遼西相去遠矣善長又誤城在平城東南

六十七里於代為西北也雁門水又東南流屈逕一故
 城背山面澤北俗謂之叱嶮城雁門水又東南流屈而
 東北積而為潭其陂斜長而不方東北可二十餘里廣
 一十五里蒹葭叢生焉敦本注之其水導源西北少咸
 之山南麓東流逕參合縣故城南地理風俗記曰道人
 城北五十里有參合鄉故縣也敦水又東澍水注之水
 出東阜下西北流逕故城北俗謂之和堆城又北合敦
 水亂流東北注雁門水故山海經曰少咸之山敦水出
 焉東流注于雁門之水郭景純曰水出雁門山謂斯水

也雁門水又東北入陽門山謂之陽門水與神泉水合
 水出葦壁北水有靈焉及其密雲不雨暘旱愆期多請
 禱焉水有二流世謂之比連泉一水東北逕一故城東
 世謂之石虎城而東北流注陽門水又東逕三會亭北
 又東逕西伺道城北又東託台谷水注之水上承神泉
 於葦壁北東逕陽門山南託台谷謂之託台水汲引泉
 谿渾濤東注行者閒一十餘渡東逕三會城南又東逕
 託台亭北又東北逕馬頭亭北東北注雁門水雁門水
 又東逕大甯郡北魏太和中置有脩水注之即山海經
 所謂脩水東流注于雁門水也地理志有于延水而無

雁門脩水之名山海經有雁門之目而無說于延河

清一

按漢志雁門郡疆陰縣諸聞澤在東北而是澤竟無聞焉自下亦通謂之于延水矣

水側有桑林故時人亦謂是水為藜桑河也斯乃北土

寡桑至此見之因以名焉于延水又東逕罽城南按史

記蔡澤燕人也謝病歸相秦號罽成君疑即澤所邑也

一清按是時秦未并燕地恐誤寰宇記許州許昌縣有剛城燕人蔡澤封此世名武罽城于

延水又東左與寧川水合水出西北東南流逕小甯縣

故城西東南流注于延水又東逕小甯縣故城南地理

志寧縣也西部都尉治王莽之博康也魏土地記曰大

甯城西二十里有小甯城昔邑人班一清按樂史邱仲

居水側賣藥于甯百餘年人以為壽後地動宅壞仲與里中數十家皆死民人取仲尸棄于延水中收其藥賣之仲被裘從而詰之此人失怖叩頭求哀仲曰不恨汝故使人知我耳去矣後為夫餘王驛使來甯此方人謂之謫仙也于延水又東黑城川水注之水有三源出黑土城西北奇源合注總為一川東南逕黑土城西又東南流逕大甯縣西而南入延河延河又東逕大甯縣故城南地理志云廣寧也王莽曰廣康矣魏土地記曰下洛城西北百三十里有大甯城于延水又東南逕茹縣故城北王莽之穀武也世謂之如口城魏土地記曰城

在鳴雞山西十里南通大道西達寧川于延水又東南逕鳴雞山西魏土地記曰下洛城東北三十里有延河東流北有鳴雞山史記曰趙襄子殺代王于夏屋而并其土襄子迎其姊於代其姊代之夫人也至此曰代已亡矣吾將何歸乎遂磨笄於山而自殺代人憐之為立祠焉因名其山為磨笄山每夜有野雞羣鳴于祠屋上故亦謂之為鳴雞山魏土地記云代城東南二十五里有馬頭山其側有鍾乳穴趙襄子既害代王迎姊姊代夫人夫人曰以弟慢夫非仁也以夫怨弟非義也磨笄自刺而死使者自殺民憐之為立神屋於山側因名之

為磨笄之山未詳孰是于延水又南逕且居縣故城南王莽之久居也其水東南流注于灤水地理志曰于延

水東至廣寧入沽非矣

一清按今本漢書作東至寧入沽誤也地理志上谷郡有寧縣有廣寧縣據是注當作廣寧非寧也入沽當作入治治即灤也道元故以為非觀此則六朝時已訛治為沽矣

又東過涿鹿縣北

涿水出涿鹿山世謂之張公泉又東北流逕涿鹿縣故

城南王莽所謂褫陸也

一清按漢志作拈陸音如拈徧九州之拈

皇帝與蚩

尤戰于涿鹿之野畱其民于涿鹿之阿即於是處也其

水又東北與阪泉合其水導源縣之東泉魏土地記曰

下洛城東南六十里有涿鹿城城東一里有阪泉泉上

有黃帝祠晉太康地理記曰阪泉亦地名也泉水東北

流與蚩尤泉會水出蚩尤城城無南

一清按黃氏本作東

面魏土

地記稱涿鹿城東南六里有蚩尤城泉水淵而不流霖

雨併則流注阪泉亂流東北入涿水涿水又東逕平原

郡南魏徙平原之民置此故立僑郡以統流雜涿水又

東北逕祚亭北而東北入灤水亦云涿水枝分入匈奴

者謂之涿耶水地理潛顯難以究昭非所知也灤水又

東南左會清夷水亦謂之滄河也水出長亭南西逕北

城村故城北又西北平鄉川水注之水出平鄉亭西西

北流注清夷水清夷水又西北逕陰莫亭在居庸縣南

十里清夷水又西會牧牛山水魏土地記曰沮陽城東八十里牧牛山下有九十九泉卽滄河之上源也山在縣東北三十里山上有道武皇帝廟者舊云山下亦有百泉競發有一神牛駁身自山而降下飲泉竭故山得其名今山下導九十九泉積以成川西南流谷水與浮圖溝水注之出夷輿縣故城西南王莽以爲朔調亭也其水俱西南流注于滄水又西南右合地裂溝古老云晉世地裂分此界閒成溝壑有小水俗謂之分界水南流入滄河又西逕居庸縣故城南魏上谷郡治昔劉虞攻公孫瓚不克北保此城爲瓚所擒有粟水入焉水

出縣下城西枕水又屈逕其縣南南注滄河又西右與陽溝水合水出縣東北西南流逕居庸縣故城北西逕大翻小翻山南高巒截雲層陵斷霧雙阜共秀競舉羣峯之上郡人王次仲少有異志年及弱冠變蒼頡舊文爲今隸書秦始皇時官務煩多以次仲所易文簡便於事要奇而召之三徵而輒不至次仲履眞懷道窮數術之美始皇怒其不恭令檻車送之次仲首發於道化爲大鳥出在車外翻飛而去落二翻於斯山故其峯巒有大翻小翻之名矣魏土地記曰沮陽城東北六十里有大翻小翻山上神名大翻神山屋東有溫湯水口其

山在縣西北二十里峯舉四十里上廟則次仲廟也右出溫湯療治萬病泉所發之麓俗謂之土亭山此水炎熱倍甚諸湯下足便爛人體療疾者要須別引消息用之耳不得言一清按下有缺文大翻山東其水東南流左會陽溝水亂流南注滄河滄河又左得清夷水口魏土地記曰牧牛泉西流與清夷水合者也自下二水互受通稱矣清夷水又西靈亭水注之水出馬蘭西澤中衆泉瀉溜歸于澤澤水所鍾以成溝瀆瀆水又左與馬蘭谿水會水導源馬蘭城城北負山勢因阿成谿民居所給惟仗此水水南流出城東南入澤水澤水又南逕靈亭北

又屈逕靈亭東次仲落鳥翻於此故是亭有靈亭之稱矣其水又南流注于清夷水清夷水又西得泉溝水水導源川南平地北注清夷水清夷水又西南得桓公泉蓋齊桓公霸世北伐山戎過孤竹西征東馬縣車上卑耳之西極故水受斯名也水源出沮陽縣東而西北流入清夷水清夷水又西逕沮陽縣故城北秦始皇上谷郡治此王莽改郡曰朔調縣曰沮陰闕駟曰涿鹿東北至上谷城六十里魏土地記曰城北有清夷水西流也其水又屈逕其城西南流注于灤水灤水南至馬陘山謂之落馬洪

又東南出山

灤水又南出山瀑布飛梁縣河注壑湍湍十許丈謂之落馬洪抑亦孟門之流也灤水自南出山謂之清泉河俗亦謂之曰干水非也灤水又東南逕良鄉縣之北界歷梁山南高粱水出焉

過廣陽薊縣北

一清按章懷後漢書注曰薊縣名本字从契从邑見說文許慎曰周封黃帝之後于

鄴从邑契聲讀若薊上谷有鄴縣而薊字下云共也則非地名書傳皆相沿作薊字

灤水又東逕廣陽縣故城北謝承後漢書曰世祖與銚期出薊至廣陽欲南行即此城也謂之小廣陽灤水又東北逕薊縣故城南魏土地記曰薊城南七里有清泉

河而不逕其北蓋經誤證矣昔周武王封堯後於薊今

城內西北隅有薊邱因邱以名邑也猶魯之曲阜齊之

營邱矣武王封召公之故國也

全氏曰薊與燕各是一國其後燕并薊耳此承

班志秦始皇二十三年滅燕以為廣陽郡漢高帝以封

盧縮為燕王更曰燕國

顧氏炎武北平古今記云史記始皇紀三十六郡無廣陽之名

當以昭帝置者為定地理志廣陽國高帝燕國昭帝元鳳元年為廣陽郡是也王莽改曰廣公

縣曰代成

一清按漢志云莽曰廣有縣曰伐戎

城有萬載宮光明殿

一清按漢

書作明光殿論衡亦曰燕王旦在明光宮則光明字疑誤

東掖門下舊慕容雋立銅

馬像處昔慕容廆有駿馬赭白有奇相逸力至雋光壽

元年齒四十九矣而駿逸不虧雋奇之比鮑氏驄命鑄

銅以圖其像親為銘讚鑄頌其傍像成而馬死矣大城東門內道左有魏征北將軍建城鄉景侯劉靖碑晉司隸校尉王密表靖功加於民宜在祀典以元康四年九月二十日刊石建碑揚于後葉矣灤水又東與洗馬溝水合水上承薊水西注大湖湖有二源水俱出縣西北平地導源流結西湖湖東西二里南北三里蓋燕之舊池也淶水澄澹川亭望遠亦為遊矚之勝所也湖水東流為洗馬溝側城南門東注昔銚期奮戟處也其水又東入灤水灤水又東逕燕王陵南陵有伏道西北出薊城中景明中造浮圖建刹窮泉掘得此道王府所禁莫

有尋者通城西北大陵而是二

一清按此處有脫文

基趾磐固猶

自高壯竟不知何王陵

一清按魏書地形志燕郡薊有燕昭王陵燕惠王陵後人遂因

此誤以燕刺王旦戾陵當之非戾陵在薊西南此陵在薊東南觀道元所敘高粱河甚明金史世宗本紀大定九年二月詔改葬漢二燕王于城東蔡珪傳初兩燕王墓舊在中都東城外海陵廣京城圍基在東城內嘗有盜發其墓大定九年詔改葬于城外俗傳六國時燕王及太子丹之葬及啓擴其東墓之樞題其端曰燕靈王舊舊古樞字通用乃西漢高祖子劉建葬也其西蓋燕康王劉嘉之葬珪作兩燕王墓辨據葬制名物款刻甚詳觀此則知地形志之非道灤水又東南高粱之水注元疑而未定可謂有識者矣

焉水出薊城西北平地泉流東注逕燕王陵北又東逕薊城北又東南流魏土地記曰薊東一十里有高粱之水者其水又東南入灤水也

又東至漁陽雍奴縣西入笥溝

漢光武建武二年封潁川太守寇恂為雍奴侯魏遣張

郃樂進圍雍奴即此城矣笥溝沽水之別名也魏土地

記曰清泉河上承桑乾河東流與潞河合灤水東入漁

陽所在枝分故俗諺曰高粱無上源一清按高粱水首受灤水于戾陵堰

見下卷鮑邱水篇清泉無下尾蓋以高粱微涓淺薄裁足津通

憑藉涓流方成川明清泉至潞所在枝分更為微津散

漫難尋故也

水經注釋卷十三終

水經注釋卷十四

仁和趙一清誠夫錄

灤餘水 沽水 鮑邱水 濡水

遼水 小遼水 湏水

灤餘水出上谷居庸關東朱氏彝尊曰下舊聞曰按後漢書王霸為上谷太守陳委輸可

從灤水漕以省陸轉輸之勞事皆施行章懷太子注引水

經注本作灤餘水遼史順州有灤榆河金更懷柔縣為灤

陽豈盡無據又昌平多溫泉有流入雙塔河者灤餘之名

竊疑因水經注既無善本今人習見坊刻遂指灤字為濕

字之譌正恐類昔人所云以不悖為悖也一清按朱氏之

言過矣灤是灤之訛溫又是濕之訛自古未聞以濕水為

灤水濕餘之名連上篇出累頭山之濕水以受稱漢昌平

舊縣自有灤水見灤水注中豈可便以濕餘水當之今本

漢志注轉寫成訛後漢因之遼金制度隨地改易此正與

隋人誤以屯氏河為毛氏河因置毛州貽笑千古安可惑

水經注釋卷十四 東潛趙氏定本

於後起之文局彼方隅之見盡廢羣籍從我曲說哉方輿紀要云榆水一名灑餘河或名溫榆河即灑餘之譌也金石文字記云水經灑餘水亦灑字之異文昌平山水記云芹城水出芹城北南入于沙河水經注芹城水出北山南逕芹城東南注灑餘水以此知沙河之為古灑餘水也傳寫之訛或為溫水後漢書王霸傳云云又云溫榆河即昌平之榆河下流為沙河入順義西南謂之西河金人名縣曰溫陽以此遼史作溫榆河本水經之灑餘河以字相似而訛也觀二顧先生之言則知朱氏以灑為溫非惟不識古傳記之文且不知有灑水者矣可謂不學之甚

關在沮陽城東南六十里居庸界故關名矣更始使者

入上谷耿況迎之於居庸關即是關也其水導源關山

南流歷故關下谿之東岸有石室三層其戶牖扇扉悉

石也蓋古關之候臺矣南則絕谷累石為關址崇墉峻

壁非輕功可舉山岫層深側道褊狹林嶂邃嶮路才容

軌曉禽暮獸寒鳴相和羈官遊子聆之者莫不傷思矣

其水歷山南逕軍都縣界又謂之軍都關續漢書曰尚

書盧植隱上谷軍都山也其水南流出關謂之下口水

流潛伏十許里是也

又東流過軍都縣南又東流過薊縣北

灑餘水故瀆東逕軍都縣故城南又東重源潛發積而

為潭謂之灑餘潭又東流易荆水注之其水導源西北

千蓼泉亦曰丁蓼水東南流逕郁山西謂之易荆水公

孫瓚之敗于鮑邱也走保易荆疑岨此水也一清按後漢書公孫

瓚傳注云前漢易縣屬涿郡續漢志曰屬河間瓚所保易京故城在今幽州歸義縣南十八里歸義即易縣唐

時更名易京城在其南若軍都縣今昌平州二十里有軍都山太行之第八陁漢立縣於山南居庸關在焉其地古有水名易荆安可以荆京音同而遂以為伯珪所保之地乎或曰易荆水即南沙河然道元已著易京城于易水篇此重錄也

易荆水又東左合虎眼泉水出平川之蓋愛博之過也
東南流入易荆水又東南與孤山之水合水發川左導源孤山東南流入易荆水謂之塔界水又東逕薊城又東逕昌平縣故城南又謂之昌平水魏土地記曰薊城東北一百四十里有昌平城城西有昌平河又東北注灤餘水灤餘水又東南流左合芹城水水出北山南逕芹城又東南流注灤餘水灤餘水又東南流逕安樂縣故城西更始使謁者韓鴻北徇承制拜吳漢為安樂令

即此城也

又北屈東南至狐奴縣西入于沽河

昔彭寵使狐奴令王梁南助光武起兵自是縣矣灤餘水於縣西南東入沽河故地理志曰灤餘水自軍都縣東至潞南入沽是也

沽河從塞外來

沽河出禦夷鎮西北九十里丹花嶺下東南流大谷水注之水發鎮北大谷谿西南流逕獨石北界石孤生不因河而自峙又南九源水注之水導北川左右翼注八川共成一水故有九源之稱其水南流至獨石注大谷

水大谷水又南逕獨石西又南逕禦夷鎮城西魏太和
 中置以捍北狄也又東南尖谷水注之水源出鎮城東
 北尖谿西南流逕鎮城東西南流注大谷水亂流南注
 沽水又南出峽夾岸有二城世謂之獨固門以其藉嶮
 憑固易為依据兼壁昇聳疎通若門故得是名也沽水
 又南左合乾谿水引北川西南逕一故亭東又西南注
 沽水沽水又西南逕赤城東趙建武年并州刺史王霸
 為燕所敗退保此城城在山阜之上下枕深隍谿水之
 名藉以變稱故河有赤城之號矣沽水又東南與鵲谷
 水合水有二源南即陽樂水也出且居縣地理志曰水

出縣東北流逕大翻山小翻山北歷女祁縣故城南地

理志曰東部都尉治王莽之祁縣也世謂之橫水又謂

之陽曲河一清按直隸赤城縣水今謂之楊田河又曰

雞田又考資治通鑑晉紀成帝咸康二年段遼別遣段

蘭將步騎數萬屯柳城西回水胡三省曰回水載記作

曲水水經注陽樂水出上谷且居縣東北流逕女祁縣

世謂之橫水又謂之陽曲水又濡河從塞外來西北逕

禦夷鎮城又東北逕孤山南又東南水流回曲謂之曲

水鎮又據載記曲水當在好城北胡氏所引乃兩曲水

一為陽樂河今宣化府龍門縣之龍門河也一為濡水

今灤河兩地懸殊非可混而為一彼曲水文云濡水又

東南水流回曲謂之曲河鎮東北三百里今胡氏乃誤為

去上谷絕遠引陽樂水之陽曲河西則當在灤州東北界
 字蓋易致混淆而此水今有樣田
 之名則故不可以曲水實之矣
 又東南逕一故亭又

東左與候鹵水合水出西北山東南流逕候鹵城北城
 在居庸縣西北二百里故名云候鹵太和中更名禦夷
 鎮又東南流注陽樂水陽樂水又東南傍狼山南山石
 白色特上亭亭孤立超出羣山之表又東南逕溫泉東
 泉在山曲之中又逕赤城西屈逕其城南東南入赤
 城河一清按漢志上谷郡且居縣陽樂水出東東入海蓋自沽以達海也河水又東南右
 合高峰水水出高峰戍東南城在山上其水西南流又
 屈而東南入沽水沽水又西南流出山逕漁陽縣故城
 西而南合七度水水出北山黃頌谷故亦謂之黃頌水
 東南流注于沽水沽水又南漁水注之水出縣東南平

地泉流西逕漁陽縣故城南考諸地說則無聞所識釋

朱氏謀瑋箋云謝云識釋疑誤考地尋川則有應氏朱氏謀瑋箋云自

今城在斯水之陽有符應說漁陽之名當屬此秦發閭

左戍漁陽即是城也漁水又西南入沽水又南與螺山

之水合水出漁陽城南小山魏土地記曰城南五里有

螺山其水西南入沽水沽水又南逕安樂縣故城東晉

書地道記曰晉封劉禪為公國俗謂之西路水也

南過漁陽狐奴縣北西南與灤餘水合為潞河

沽水西南流逕狐奴山西又南逕狐奴縣故城西漁陽

太守張堪於縣開稻田教民植種百姓得以殷富童謡

歌曰桑無附枝麥秀兩岐張君為政樂不可支視事八年匈奴不敢犯塞沽水又南陽重溝水注之水出狐奴山南轉逕狐奴城西王莽之所謂舉符也側城南注右會沽水沽水又南灤餘水注之沽水又南左會鮑邱水世所謂東潞也沽水又南逕潞縣為有潞一清按此名處有誤文潞河也魏土地記曰城西三十里有潞河也

又東南至雍奴縣西入笥溝

灤水入焉俗謂之合口也又東鮑邱水於縣西北而東出焉

又東南至泉州縣與清河合東入于海清河者派河尾也

沽河又東南逕泉州縣故城東王莽之泉調也沽水又東南合清河也今無水清淇漳洹澨易涑濡沽虜池同歸於海故經曰派河尾也

鮑邱水從塞外來南過漁陽縣東

鮑邱水出禦夷北塞中南流逕九莊嶺東俗謂之大榆

河又南逕鎮東南九十里西密雲戍西

方輿紀要曰禦夷鎮城在保安

右衛西北所謂濡源之地後魏初拓跋祿官分其國為三部一居上谷之北濡源之西自統之魏主燾始置禦夷鎮于濡源西北為六鎮之一水經注密雲戍在禦夷鎮東南九十里鮑邱水逕其西似鎮與戍境相近賈耽曰密雲去禦夷鎮幾九百里道元時六鎮已陷沒豈傳聞之誤與抑紀載之訛與一清按魏書道元曾持節馳驛與大都督李崇籌宜六鎮改州必親至其地故應詳審且注明云有東密雲故是城言西則近禦夷鎮者西

密雲也非昌平州之密雲縣後魏於此置密雲郡及縣者也

又南左合道人谿水水

導北川南流逕孔山西又歷密雲戍東左合孟廣峒水

水出峒下峒甚嶒峻峨峨冠衆山之表其水西逕孔山

南上有洞穴開明故土俗以孔山流稱峒水又西南至

密雲戍東西注道人水亂流西南逕密雲戍城南右會

大榆河有東密雲故是城言西矣大榆河又東南流白

楊泉水注之北發白楊谿望離右注大榆河又東南龍

芻溪水自坎注之大榆河又東南出峽逕安州舊漁陽

郡之滑鹽縣南左合縣之北谿水水出縣北廣長塹南

太和中掘此以防北狄其水南流逕滑鹽縣故城東王

莽更名匡德也漢明帝改曰鹽田

一清按漢志漁陽郡滑鹽縣應劭曰明帝

更名鹽似脫田字

右承治

何氏曰承與丞通蓋鹽官也

世謂之斛鹽城西北

去禦夷鎮二百里南注鮑邱水又南逕僂奚

一清按漢志作庠奚

蓋誤字也孟康曰庠音題字或作題

縣故城東王莽更之曰敦德也鮑邱

水又西南逕獷平縣故城東王莽之所謂平獷也又南

右合三城水水出曰里山西逕平獷城謂之三城水又

逕香陁山上悉生藁本香世故名焉又西逕石窟南窟

內寬廣行者依焉窟內有水淵而不流栖薄者取給焉

又西北逕伏凌山南與石門水合水出伏凌山山高峻

巖鄣寒深陰崖積雪凝冰夏結事同離騷峨峨之詠故

世人因以名山也桑谷水西南流注之是水有桑谷之名蓋浴出桑谿故也又西南逕獮平城東南而右注鮑邱水鮑邱水東南逕漁陽縣漁陽郡治也秦始皇二十二年置王莽更名通潞縣曰得漁鮑邱水又西南流公孫瓚既害劉虞烏丸思劉氏之德迎其子和合衆十萬破瓚於是水之上斬首一萬鮑邱水又西南歷狐奴城東又西南流注於沽河亂流而南

又南過潞縣西

鮑邱水入潞通得鮑邱之稱矣高粱水注之首受灤水於戾陵堰水北有梁山山有燕刺王旦之陵故以戾陵

名堰水自堰枝分東逕梁山南又東北逕劉靖碑北其碑云魏使持節都督河北道諸軍事征北將軍建城鄉侯沛國劉靖字文恭登梁山以觀源流相原陘以度形勢嘉武安之通渠美秦民之殷富乃使帳下督丁鴻軍士千人以嘉平二年立遏於水導高粱河造戾陵遏開車箱渠其遏表云高粱河水者出自并州黃河之別源也

一清按此指桑乾卽道元注所謂高粱河首受灤水于戾陵堰者也而又以爲高粱無上源何耶

長

岸峻固直截中流積石籠以爲主遏高一丈東西長三十丈南北廣七十餘步依北岸立水門門廣四丈立水遏長十丈山水暴發則乘遏東下平流守常則自門北

入灌田歲二千頃凡所封地百餘萬畝至景元三年辛酉詔書以民食轉廣陸費不贍遣謁者樊晨更制水門限田千頃刻地四千三百一十六頃出給郡縣改定田五千九百三十頃水流乘車箱渠自薊西北逕昌平東盡漁陽潞縣凡所潤合四五百里所灌田萬有餘頃高下孔齊原陞底平疏之斯溉決之斯散導渠口以爲濤門灑漑池以爲甘澤施加于當時敷被于後世晉元康四年君少子驍騎將軍平鄉侯宏受命使持節監幽州諸軍事領護烏丸校尉寧朔將軍遏立積三十六載至五年夏六月洪水暴出毀損四分之三剩北岸七十餘

丈上渠車箱所在漫溢追惟前立遏之勲親臨山川指授規略命司馬關內侯逢惲內外將士二千人起長岸立石渠修主遏治水門門廣四丈立水遏五尺興復載利通塞之宜準遵舊制凡用功四萬有餘焉諸部王侯不召而自至繼負而趨事者蓋數千人詩載經始勿亟易稱民忘其勞斯之謂乎於是二府文武之士感秦國思鄭渠之績魏人置豹祀之義乃遐慕仁政追述成功元康五年十月十一日刊石立表以紀勲烈并記遏制度永爲後式焉事見其碑辭又東南流逕薊縣北又東至潞縣注于鮑邱水又南逕潞縣故城西王莽之通路

亭也漢光武遣吳漢耿弇等破銅馬五幡於潞東謂是縣也屈而東南流逕潞城南世祖拜彭寵爲漁陽太守治此寵叛光武遣遊擊將軍鄧隆伐之軍于是水之南光武策其必敗果爲寵所破遺壁故壘存焉鮑邱水又東南入夏澤澤南紆曲渚一十餘里北佩謙澤眇望無垠也

又南至雍奴縣北屈東入于海

鮑邱水自雍奴縣故城西北舊分筍溝水東出今筍溝水斷衆川東注混同一瀆東逕其縣北又東與洵河合水出右北平無終縣西山白楊谷西北流逕平谷縣屈

西南流獨樂水入焉水出北抱犢固南逕平谷縣故城東後漢建武元年光武遣十二將追大槍五幡及平谷大破之于是縣也其水南流入于洵洵水又東左合盤山水水出山上其山峻嶮人跡罕交去山三十許里望山上水可高二十餘里素湍浩然頽波歷溪浴流而下自西北轉注于洵水洵水又東南逕平谷縣故城東南與洵河會水出北山山在僂奚縣故城東南東南流逕博陸故城北又屈逕其城東世謂之平陸城非也漢武帝璽書封大司馬霍光爲侯國

沈氏曰漢表是昭帝始元二年封今從光傳

文穎曰博大陸平取其嘉名而無其縣食邑北海河東

全氏曰是北海之河東城見本注按外戚恩澤侯表北海河閒東郡師古曰光初封食北海河閒後益封又食東郡與本薛瓚曰按漁陽有博陸城謂此也今在且居傳注不同

山之陽處平陸之上匝帶川流面據四水文氏所謂無縣有嘉美名也洳水又東南逕平谷縣故城西而東南

流注于洵渠河洵河又南逕絳城東而南合五百溝水水出七山北東逕平谷縣之絳城南東入于洵河洵河

又東南逕臨洵城北屈而歷其城東側城南出一清按方輿紀

要臨洵城石趙置亦曰臨渠後魏廢唐武德二年置縣貞觀初省竹書紀年梁惠成王

十六年齊師及燕戰于洵水齊師遁卽是水也洵水又南入鮑邱水又東合泉州渠口故瀆上承虜池水於泉

州縣故以泉州爲名北逕泉州縣東又北逕雍奴縣東

西去雍奴故城一百二十里自虜池北入其下歷水澤一百八十里入鮑邱河謂之泉州口陳壽魏志曰曹太

祖以蹋頓擾邊將征之從洵口鑿渠逕雍奴泉州以通河海者也今無水鮑邱水又東庚水注之水出右北平

徐無縣北塞中而南流歷徐無山得黑牛谷水又得沙谷水並西出山東流注庚水昔田子泰避難居之衆至

五千家開山圖曰山出不灰之木生火之石案注云其木色黑似炭而無葉有石赤色如丹以二石相磨則火

發以然無灰之木可以終身今則無之其水又逕徐無

縣故城東王莽之北順亭魏土地記曰右北平城東北一百一十里有徐無城其水又西南與周盧溪水合水出徐無山東南流注庚水庚水又西南流灑水注之水出右北平俊靡縣王莽之俊麻也東南流世謂之車輦水又東南與溫泉水合水出北山溫溪即溫源也養疾者不能澡其炎漂以其過灼故也魏土地記曰徐無城東有溫湯即此也其水南流百步便伏流入于地下水盛則通注灑水又東南逕石門峽山高嶄絕壁立洞開俗謂之石門口漢中平四年漁陽張純反殺右北平太守劉政遼東太守陽紘

一清按後漢書靈帝紀作陽終

中平五年詔中

郎將孟溢

一清按靈帝紀作孟益

率公孫瓚討純戰于石門大破

之日知錄曰後漢書公孫瓚傳中平中張純與烏桓邱之力居等入寇瓚追擊戰于屬國石門大敗之註石門山今營州柳城縣西南本紀但言石門而傳言屬國石門明有兩石門水經所指乃漁陽之石門非遼東屬國之石門當以柳城為是

通典柳城有石門山 灑水又東南流謂之北黃水又

屈而為南黃水又西南逕無終山即帛仲理所合神丹

處也又於是山作金五千斤以救百姓山有陽翁伯玉

田在縣西北有陽公壇社即陽公之故居也搜神記曰

雍伯雒陽人至性篤孝父母終沒葬之於無終山山高

八十里而上無水雍伯置飲焉有人就飲與石一斗令

種之玉生其田北平徐氏有女雍伯求之要以白璧一

雙媒者致命伯至玉田求得五雙徐氏妻之遂即家焉
一清按御覽引水經曰翁伯周末避亂適無終山山前有泉甚清夏常澡浴得玉璧一雙於泉側與今本異
 陽氏譜敘言翁伯是周景王之孫食采陽樊春秋之末爰宅無終因陽樊而易氏焉愛人博施天祚玉田其碑文云居於縣北六十里翁同之山後路徙于西山之下陽公又遷焉而受玉田之賜情不好寶玉田自去今猶謂之為玉田陽于寶曰於種石處四角作大石柱各一丈中央一頃之地名曰玉田至今相傳云玉田之揭起于此矣而今不知所在同之譜敘自去文矣
一清按此未詳疑有誤史記貨殖傳云販脂辱處也而雍伯千金索隱曰漢書作翁伯事亦見仙傳拾遺又孝德傳云魏

陽雍河南洛陽人同之譜敘翁同似是陽公之名今薊州城北五里有崆峒山寰宇記崆峒山一名翁同山蓋以人得名又去文二字或云是云文之訛
藍水注之水出北山東屈而南

流逕無終縣故城東故城無終子國也春秋襄公四年無終子嘉父使孟樂如晉因魏絳納虎豹之皮請和諸戎是也故燕地矣秦始皇二十二年滅燕置右北平郡

治此王莽之所謂北順也漢世李廣為郡出遇伏石謂虎也射之飲羽即此處矣
宋氏琬曰漢右北平郡治平

土地記曰薊城東北三百里有右北平城薊城今京師也括地志漁陽郡東南七十里右北平城當在今薊州玉田縣界此後漢之右北平也若平罡則在盧龍塞之東北三四百里此前漢之右北平而李廣之所守也射虎石酈氏水經注言此石在玉田無終之間是以後漢之右北平為李廣所治與東越晉陞之說自相矛盾

著書之難如此魏土地記曰右北平城西北百三十里有無終

城顧氏炎武曰樊噲傳擊陳豨破得綦毋卯尹潘軍于

平與一清按顧氏之說是也不然右北平去太原東北二千餘里嘉父安得遠涉而與晉和

其水又南入灑灑水又西南入于庚水地理志曰灑水出俊靡

縣南至無終東入庚水世亦謂之為柘水也南逕燕山

下懸巖之側有石鼓去地百餘丈望若數百石困有石

梁貫之鼓之東南有石人援桴狀同擊勢者舊言燕山

石鼓鳴則土有兵庚水又南逕北平城西而南入鮑邱

水謂之柘口一清按漢志右北平郡無終縣漚水西至雍奴入海過郡二行六百五十里師古曰漚音庚即庚水也蓋合鮑邱水以入海鮑邱水又東逕右北平郡故城南

魏土地記曰薊城東北三百里有右北平城鮑邱水又

東巨梁水注之水出土垠縣北陳宮山西南流逕觀雞

山謂之觀雞水水東有觀雞寺寺內起大堂甚高廣可

容千僧下悉結石為之上加塗墍基內疏通枝經脈散

基側室外四出爨火炎勢內流一堂盡溫蓋以此土寒

嚴霜氣肅猛出家沙門率皆貧薄施主慮闕道業故崇

斯構是以志道者多栖託焉其水又西南流右合區落

水水出縣北山東南流入巨梁水巨梁水又西逕土垠

縣故城西左會寒渡水水出縣東北西南流至縣右注

梁河梁河又南澗于水注之水出東北山西南流逕土

垠

水

經

垠縣故城東西南流入巨梁水又東南右合五里水水
 發北平城東北五里山故世以五里名溝一名田繼泉
 西流南屈逕北平城東東南流注巨梁河亂流入于鮑
 邱水巨梁自是水之南極虜池西至泉州雍奴東極于
 海謂之雍奴藪其澤野有九十九澱枝流條谷往往逕
 通非唯梁河鮑邱歸海者也

濡水從塞外來東南過遼西合支縣北

一清按濡水有二禹貢雖指日一音

人朱切出涿郡故安縣東南流至范陽縣合易水入河春秋昭公七年齊燕盟于濡上即此水一音乃官切讀若難從塞外來東南流至系縣碣石山入海即今灤河

濡水出禦夷鎮東南其水二源雙引夾山西北流出山

合成一川又西北逕禦夷故城東鎮北百四十里北流

左則連泉水注之水出故城東西北流逕故城南又西

北逕淶水池南其水淵而不流其水又西屈而北流又

東逕故城北連結兩池沼謂之連泉浦又東北注難河

難河右則汙水入焉水出東塢南西北流逕沙野南北

人名之曰沙

一清按下有脫字

鎮東北二百三十里西北入難

河濡難聲相近狄俗語譌耳濡水又北逕沙野西又北

逕箕安山東屈而東北流逕沙野北東北流逕松林山

北水北有池潭而不流濡水又東北流逕孤山南東北

流呂泉水注之水出呂泉塢西東南流屈而東逕塢南

東北流三泉水注之其源三泉雁次合為一水鎮東北
 四百里東南注呂泉水呂泉水又東逕孤山北又東北
 逆流水注之水出東南導源西流右屈而東北注松林
 山水會之水出山南東注逆水亂流東北注濡河濡河
 又東盤泉入焉水自西北東南流注濡河濡河又東南
 水流迴曲謂之曲河鎮東北三百里又東出峽入安州
 界東南流逕漁陽白檀縣故城地理志曰洫水一清按今本漢
書亦作洫然注不別出洫水是當即出北蠻夷中漢景
濡水矣此六朝以前本之訛誤也帝詔李廣曰將軍其帥師東轅弭節白檀者也又東南
 流右與要水合水出塞外三川竝導謂之大要水也東

南流逕要陽縣故城東

魏書地形志密雲郡要陽前漢屬漁陽後漢晉罷後復屬桃花

山方輿紀要要陽廢縣在密雲縣東南六十里漢縣漁陽都尉治此後漢廢後魏復置屬密雲郡北齊廢魏志縣有桃花山即今桃山在薊州西南蓋境相接也一統志要陽廢縣在密雲縣東南漢縣在今古北口外後魏時僑置於此屬密雲郡北齊省縣志要陽故城在縣東南六十里也畿輔通志要陽故城在密雲縣東北塞外縣志要陽故城本都尉治王莽更之曰要術矣要水又在東南六十里

東南流逕白檀縣而東南流入于濡濡水又東南索頭

水注之水北流南逕廣陽僑郡西魏分右北平置今安

州治又南流注于濡水濡水又東南流武列水入焉其

水三川派合西源右為谿水亦曰西藏水東南流出谿

與蟠泉水合泉發州東十五里東流九十里東注西藏

水西藏水又西南流東藏水注之水出東谿一曰東藏

水西南流出谷與中藏水合水導中谿南流出谷南注

東藏水故目其川曰三藏川水曰三藏水一清按通鑑

康四年燕王皝遣慕容恪伏精騎七千于密雲山大敗麻秋于三藏口蓋三藏水所會之口也在今古北口塞

外東藏水又南右入西藏水亂流右會龍泉水水出東

山下淵深不測其水西南流注于三藏水三藏水畿輔

城水在密雲縣東北其水三川派合曰西藏川東藏川中藏川其合處曰三藏口下流入于潮河方輿紀要密

雲縣東北有武列水亦曰三藏川其水三川派合曰西

藏川中藏川東藏川其合處曰三藏口晉咸康四年慕容皝伏兵于此敗趙將麻秋處也水經注要水武列三

水三藏水竝注于濡水濡同灤潮水亦有灤河之名三藏水又西南流與龍芻水合西出于龍芻之谿東流入

三藏水又東南流逕武列谿謂之武列水東南歷石槌

下槌在層巒之上有孤石雲舉臨崖危峻可高百餘仞

牧守所逕命選練之士彎張弧矢無能屈其崇標者其

水東合流入濡濡水又東南五渡水注之水北出安樂

縣丁原山南流逕其縣故城西本三會城也其水南入

五渡塘於其川也流紆曲溯涉者頻濟故川塘取名矣

又南流注於濡濡水又與高石水合水東出安樂縣東

山西流歷三會城南西入五渡川下注濡水濡水又東

南逕盧龍塞塞道自無終縣東出渡濡水向林蘭陁東

至青陁盧龍之嶮峻坂縈折故有九崢之名矣燕景昭元

璽二年遣將軍步渾治盧龍塞道焚山刊石令通方軌

刻石嶺上以記事功其銘尚存而庚杲之

何氏曰庚闡字仲初注誤

以為杲之一清按下文云而仲初言在南非也則又不誤豈以杲之為仲初之名乎

注揚都賦言

盧龍山在平罌城北殊為孟浪遠失事實余按盧龍東

越青陘至凡城二百許里自凡城東北出趣平罌故城

可百八十里向黃龍則五百里故陳壽魏志田疇引軍

出盧龍塞塹山堙谷五百餘里逕白檀歷平罌登白狼

望柳城平罌在盧龍東北遠矣而仲初言在南非也濡

水又東南逕盧龍故城東漢建安十二年魏武征蹋頓

所築也濡水又南黃洛水注之水北出盧龍山南流入

于濡濡水又東南敖水右合焉水出盧龍塞西南流注

濡水又合屈而注左得潤水右會敖水二水並自盧龍

西注濡水又東南流逕令支縣故城東王莽之令氏亭

也秦始皇二十二年分燕置遼西郡令支隸焉魏土地

記曰肥如城西十里有濡水南流注孤竹城西右合元

水也謂之小濡水非也水出肥如縣東北元溪西南流

逕其縣東東屈南轉西迴逕肥如縣故城南俗又謂之

肥如水非也故城肥子國應劭曰晉滅肥肥子奔燕

全氏

曰肥子為晉荀吳所俘不得云奔燕

燕封於此故曰肥如也漢高帝六年

封蔡寅為侯國西南流右會盧水水出縣東北沮溪南

流謂之大沮水又南左合陽樂水水出東北陽樂縣地

理風俗記曰陽樂故燕地遼西郡治秦始皇二十二年

置魏土地記曰海陽城西南有陽樂城其水又西南入

于沮水謂之陽口沮水又西南小沮水注之水發冷溪世

謂之冷池又南得溫泉水口水出東北溫溪自溪西南

流入于小沮水小沮水又南流與大沮水合而為盧水

也桑欽說盧子之書言晉既滅肥遷其族於盧水全氏曰上

言燕封肥子此又引桑欽語以為晉遷肥族盧水非晉封域安得遷亡國之人于此盧水有二渠

號小沮大沮合而入于元水盧水又南與溫水合水出

肥如城北西流注于元水地理志曰盧水又南入元水

元水又西南逕孤竹城北西入濡水故地理志曰元水

東入濡蓋自東而注也地理志曰令支有孤竹城故孤

竹國也史記曰孤竹君之二子伯夷叔齊讓國于此而

餓死于首陽漢靈帝時遼西太守廉翻夢人謂己曰余

孤竹君之子伯夷之弟遼海漂吾棺榔聞君仁善願見

藏覆明日視之水上有浮棺吏嗤笑者皆無疾而死於

是改葬之晉書地道志曰遼西人見遼水有浮棺欲破

之語曰我孤竹君子也汝破我何為因為立祠焉祠在

山上城在山側肥如縣南十二里水之會也

又東南過海陽縣西南入于海

濡水自孤竹城東南逕西鄉北瓠溝水注之水出城東南流注濡水濡水又逕故城南分爲二水北水枝出世謂之小濡水也東逕樂安亭北東南入海濡水東南流逕樂安亭南東與新河故瀆合自雍奴縣承鮑邱水東出謂之鹽關口魏太祖征蹋頓與洵口俱導也世謂之新河矣陳壽魏志以通河海也新河又東北絕庚水又東北出逕右北平絕洵渠之水一清按一統志引此文作巨梁水是蓋庚水在巨梁西北新河絕庚水則今沽河合洵河而名爲薊運河者也于是東絕巨梁水巨梁水今還鄉河也于是而清而灤迤邐東入于海若絕庚水之後更絕洵水則是水反西出無是理也又東北逕昌城縣故城北王莽之淑武也至新河又東分爲二水枝瀆

東南入海新河自枝渠東出合封大水謂之交流合水出新安平縣西南流逕新安平縣故城西地理志遼西之屬縣也又東南流龍鮮水注之水出縣西北世謂之馬頭水二源俱導南合一川東流注封大水地理志曰龍鮮水東入封大水者也亂流南會新河南流入于海地理志曰封大水於海陽縣南入海新河又東出海陽縣與緩虛水會水出新安平縣東北世謂之大籠水東南流逕令支城西西南流與新河合南流入于海地理志曰緩虛水與封大水皆南入海新河又東與素河會謂之白水口水出令支縣之藍山南合新河又東南入

海新河又東至九澗口枝分南注海新河又東逕海陽

縣故城南漢高祖六年封搖母餘為侯國全氏曰按搖母餘南粵將

豈有嶠外之產而封之遼海者魏土地記曰令支城南故索隱曰是南越縣志闕是矣

六十里有海陽城者也新河又東與清水會水出海陽

縣東南流逕海陽城東又南合新河又南流一十許里

西入九澗口注海新河東絕清水又東木究水出焉南

入海新河又東左迤與北陽孤淀合右絕新河南注海

新河又東會于濡濡水又東南至絜縣碣石山文穎曰

碣石在遼西絜縣王莽之選武也絜縣并屬臨渝王莽

更臨渝為憑德地理志曰大碣石山在右北平驪成縣

西南王莽改曰揭石也禹貢錐指曰山有名同而繫之

必有小碣石在蓋即絜縣海旁之石矣酈道元既宗文

穎以為碣石在絜縣又引驪成大碣石以證之若以其

山為跨二縣之境也者今按濡水從塞外來東南流逕

樂安亭南東與新河故瀆合又東南至絜縣碣石山而

南入于海樂安亭者蓋即今樂亭縣東北之樂安故城

也絜縣在其南驪成在其西據濡水歷亭南而東又東

南至碣石則碣石在亭之東南與驪成之大碣石相去

闊絕安得連為一山郭璞注山海經曰碣石在臨渝或

云在驪成蓋兩存之愚謂在臨渝者為是也文穎以建

安時正班固之碣石猶王橫以新莽時正史遷之禹河

也漢武帝亦嘗登之以望巨海而勒其石於此今枕海

有石如甬道數十里當山頂有大石如柱形往往而見

立于巨海之中潮水大至則隱及潮波退不動不沒不

知深淺世名之曰天橋柱也狀若人造要亦非人力所

就韋昭亦指此以為碣石也三齊略記曰始皇於海中作石橋海神為之豎柱始皇求與相見神曰我形醜莫圖我形當與帝相見乃入海四十里見海神左右莫動手工人潛以脚畫其狀神怒曰帝負約速去始皇轉馬還前脚猶立後脚隨崩僅得登岸畫者溺死於海眾山之石皆傾注今猶岌岌東趣疑卽是也濡水於此南入海而不逕海陽縣西也蓋經誤證耳又按管子齊桓公二十年征孤竹未至卑耳之溪十里闐然止瞠然視援弓將射引而未發謂左右曰見前乎左右對曰不見公曰寡人見長尺而人物具焉冠右祛衣走馬前豈有人

若此乎管仲對曰臣聞登山之神有俞兒長尺人物具霸王之君興則登山之神見且走馬前走導也祛衣示前有水右祛衣示從右方涉也至卑耳之谿有贊水者從左方涉其深及冠右方涉其深及膝已涉陸濟桓公拜曰仲父之聖至此寡人之抵罪也久矣今自孤竹南出則巨海矣而滄海之中山望多矣然卑耳之川若贊

谿者亦不知所在也

一清按史記齊世家云桓公稱曰寡人南伐召陵望熊山北伐山戎

離枝孤竹西伐大夏涉流沙東馬懸車登太行至卑耳山還正義云卑音辟是也索隱曰卑耳山在河東大陽縣方輿紀要卑耳山在山西平陸縣東桓公西伐登大行卑耳宜在漢之大陽而道元以為谿名記于濡水是

拘夏辟耳山之谿也 豈亦贊谿之異名乎昔在漢世海水波襄吞食地廣當

同碣石苞淪洪波也

大遼水出塞外衛白平山

一清按山海經海內東經曰遼水出衛臯東郭註云出塞外衛

臯山似合白平二字為一東南入塞過遼東襄平縣西

遼水亦言出砭石山自塞外東流直遼東之望平縣西

王莽之長說也屈而西南流逕襄平縣故城西秦始皇

二十二年滅燕置遼東郡治此漢高帝八年封紀通為

侯國 全氏曰紀通所封之襄平不在遼東索隱曰是臨淮地理志臨淮郡襄平縣侯國王莽之

昌平也故平州治又東逕遼隧縣故城西王莽更名之

曰順睦也公孫淵遣將軍畢衍拒司馬懿於遼隧即是

處也遼水又南歷縣有小遼水共流注之也

又東南過房縣西

地理志曰房故遼東之屬縣遼水右會白狼水水出右

北平白狼縣東南逕廣成縣北流西北屈逕廣成縣故

城南王莽之平虜也俗謂之廣都城又西北石城川水

注之水出西南石城山東流逕石城縣故城南地理志

曰右北平有石城縣北屈逕白鹿山西即白狼山也魏

書國志曰遼西單于蹋頓尤強為袁氏所厚故袁尚歸

之數入為害公出盧龍塹山堙谷五百餘里未至柳城

二百里尚與蹋頓將數萬騎逆戰公登白狼山望柳城

卒與虜遇乘其不整縱兵擊之虜衆大崩斬蹋頓胡漢
 降者二十萬口英雄記曰曹操于是擊馬鞍于馬上作
 十片卽於此也博物志曰魏武於馬上逢獅子使格之
 殺傷甚衆王乃統率常從健兒數百人擊之獅子哮呼
 奮越左右咸驚王忽見一物從林中出如狸超上王車
 輒上獅子將至此獸便跳上獅子頭上獅子卽伏不敢
 起於是遂殺之得獅子而還未至洛陽四十里洛中雞
 狗皆無鳴吠者也其水又東北入廣成縣東注白狼水
 白狼水北逕白狼縣故城東王莽更名伏狄白狼水又
 東方城川水注之水發源西南山下流北屈逕一故城

西世謂之雀目城東屈逕方城北東入白狼水白狼水

又東北逕昌黎縣故城西地理志曰交黎也東部都尉

治王莽之禽虜也應劭曰今昌黎也

一清按續志無昌黎縣晉志以爲魏

置魏書三少帝紀正始五年九月鮮卑內附置遼東屬國立昌黎縣以居之今以仲瑗之言考之則東京已有是縣旋廢而魏復立之宋琬曰後漢志作昌遼或黎字之誤非也通鑑註昌黎漢交黎縣屬遼西郡而後漢屬遼東屬國都尉魏立昌黎縣後立昌黎郡章懷後漢書註夫黎縣屬遼東屬國寰宇記扶黎城在柳城縣東扶黎之名不見史志然必有據也

高平川水注之水出西北平川東流逕倭城北蓋倭地人徙之又東南逕乳樓城北蓋逕戎鄉

邑兼夷稱之又東南注白狼水白狼水又東北自魯水

注之水導西北遠山東南注白狼水白狼水又東北逕

龍山西燕慕容皝以柳城之北龍山之南福地也使陽

裕築龍城改柳城為龍城縣十二年黑龍白龍見于龍

山皝親觀龍去二百步祭以太牢二龍交首嬉翔解角

而去皝說大赦號新宮曰和龍宮立龍翔祠于山上白

狼水又北逕黃龍城東十三州志曰遼東屬國都尉治

昌遼道一清按續志遼東屬國劉昭補註曰故邯鄲西

部都尉安帝時以為屬國都尉別領六城首曰昌遼故天遼而前

志又無天遼之目有黃龍亭者也魏營州刺史治魏土

地記曰黃龍城西南有白狼河東北流附城東北下即是

也又東北濫真水出西北塞外東南歷重山東南入白

狼水白狼水又東北出東流分為二水右水疑即渝水

也地理志曰渝水首受白狼水一清按漢志遼西郡臨

入塞外交黎縣渝水首受塞外南入海道元以為即是一水又右北平郡字縣渝水出東今字縣不知所在文

獻通考貞觀二十一年李勣破高麗于南蘇班師至頗利城渡白狼黃崑二水皆由鄴以下勣怪二水狹淺問

契丹遼源所在云此二水更行數里合西南巡山逕一

而南流即稱遼水更無遼源可尋也

故城西以為河連城疑是臨渝縣之故城王莽曰馮德

者矣渝水南流東屈與一水會世名之曰檻倫水蓋戎

方之變名耳一清按通鑑檻盧城下註引此文方輿紀

要檻盧城在凡城東城在水傍故曰檻盧疑即地理志所謂侯水北入渝者也十三州志曰侯水

南入渝地理志言蓋自北而南也又西南流注於渝渝

營邱在齊而名之於遼燕之間者蓋燕齊遼迴僑分所

在方輿紀要營邱城在營州南五代志慕容廆以宥州

置領富平永安二縣高齊時唐契丹重熙初析霸城置營邱縣蓋因故郡為名也其水東南入

海地理志曰渝水自塞外南入海一水東北出塞為白

狼水又東南流至房縣注于遼魏土地記曰白狼水下

入遼也

又東過安市縣西南入于海

十三州志曰大遼水自塞外西南至安市入于海

又元菟高句麗縣有遼山小遼水所出

縣故高句麗胡之國也漢武帝元封三年平右渠置元

菟郡於此王莽之下句麗水出遼山西南流逕遼陽縣

與大梁水會水出北塞外西南流注遼水故地理志曰

大梁水西南至遼陽入遼郡國志曰縣故屬遼東後入

元菟其水西南流故謂之為梁水也小遼水又西南逕

襄平縣為淡淵晉永嘉三年涸小遼水又逕襄平縣入

大梁水司馬宣王之平遼東也斬公孫淵於斯水之上

者也

西南至遼隧縣入于大遼水也

沮水出樂浪鏤方縣東南過於臨沮縣一清按兩漢志晉志魏志隋五代志

俱無臨沮縣未知從何得名此卷中之大可疑者東入于海

許慎云沮水出鏤方東入海一日出沮水縣十三州志

曰沮水縣在樂浪東北鏤方縣在郡東蓋出其縣而逕

鏤方也朱氏謀埠箋曰謝云此下宋本原缺十二字昔燕人衛滿自沮水西

至朝鮮朝鮮故箕子國也箕子教民以義田織信厚約

以八法而下知禁遂成禮俗戰國時滿乃王之都王險

城地方數千里至其孫右渠漢武帝元封三年遣樓船

將軍楊僕左將軍荀彘討右渠破渠于沮水遂滅之若

沮水東流無渡沮之理其地今高句麗之國治余訪蕃

使言城在沮水之陽一清按漢志遼東郡險瀆縣應劭

險瀆臣瓚曰王險城在樂浪郡沮水之東北自是險瀆也其水西流逕故樂浪朝鮮

縣即樂浪郡治漢武帝置而西北流故地理志曰沮水

西至增地縣入海又漢興以朝鮮為遠循遼東故塞至

沮水為界考之今古於事差繆蓋經誤證也全氏曰按

之水不見于水經注者遼西郡新安平縣夷水東入塞

外柳城縣馬首山在西南參柳水北入海狐蘇縣唐就

風土記云水至徒河入海與地平故曰平盧今語訛為

彭盧紮縣下官水南入海又有碣石水賓水皆南入海

遼東郡居就縣室偽山室偽水所出北至襄平入梁也

番汗縣沛水出塞外西南入海應劭曰汗水出塞外西

南入海沓氏縣應劭曰沓水也師古曰凡言氏者皆謂

因之而立名說文云沓語多沓沓也遼東有沓氏縣徐

鉉曰語多沓沓若水之流然則本非水名也或曰非也

三國志吳嘉禾二年謀討公孫淵陸瑁曰沓渚至淵道

里尚遠漢沓氏縣西南臨海渚謂之沓渚泛海至遼沓

渚其登涉之所也元菟郡高句麗縣南蘇水西北逕塞

外西蓋馬縣馬訾水馬訾水近代謂之鴨綠江新唐書

水經注卷十四 東潛趙氏定本

云馬訾水出鞞鞞長白山色若鴨頭號鴨綠水隋元萬
 頃檄文曰不知守鴨綠之險高麗報曰謹聞矣即此
 水也西北入鹽難水西南至西安平入海過郡二行一
 千一百里後漢書東夷傳句驪一名貊耳有別種依小
 水為居因名曰小水貊章懷注引魏氏春秋曰遼東郡
 西安平縣北有小水南流入海樂浪郡含資縣帶水西
 至帶方入海吞列縣分黎山列水所出西至黏蟬入海
 行八百二十里此殆所云有小水四十八并三千四
 十六里者也不特此也武帝紀云元朔元年東夷歲君
 南閭等降以其地為蒼海郡三年罷元封三年朝鮮降
 以其地為樂浪元菟臨屯真番郡臣瓚曰茂陵書臨屯
 郡治東曉縣去長安六千一百三十八里十五縣真番
 郡治雲縣去長安七千六百四十五縣昭帝紀云
 始元五年罷真番郡而臨屯之罷據范氏東夷傳亦在
 始元五年三郡既廢其
 地之水亦不復可問矣

水經注釋卷十四終

程